



庫

志

ル 5  
3142  
6



門 儿 5  
3142  
卷 6

宣平縣志卷之十二

列女

人倫之變乃以節聞或縻其軀蘭摧益芬敬載管彤  
用貞松筠述列女志

進士梁錯妻葉氏錯既第未及祿而卒葉年二十七  
哀嫻攜孤泣血負土營朋穴以自誓竭力教子讀  
書推餘貲以周貧乏

鄭孝廉通志妻戴氏青年夫亡無子養姑勤苦三十  
餘年事聞詔旌其門摘何廣居詩 婦道無古今  
力行良有以偉哉貞節門聞

者皆  
興起

蔡宗吉妻林氏賊焚東巖媳包氏投巖死林曰媳婦且死義不辱我豈獨生乎亦罵賊投巖死

入祠祀

蔡儼妻包氏生而貞靜年十歲能諳列女傳大義正統己巳鄉寇亂從舅姑避難東巖巖破被執計給賊曰我有金在穴中盍從我取之賊以爲然釋與同往至巖險處氏仰天歎曰妾命盡此矣遂抱幼女投崖下死時年二十五成化間旌表時婦女投巖死者千餘人有梁朱氏梁烜妻何氏梁谷存妻何氏梁知訓妻徐氏梁垚妻葉氏梁埒妻章氏朱氏梁鼎塾妻劉氏梁鼎城妻蕭氏見梁祚璿貞烈

補遺傳餘皆不傳

蔡大家汝嘉長女其祖母新嶺梁氏母石侯梁氏祖母與母各欲將女適己外家同日具聘大家懼累父兄致訟難於兩背遂引刀自截其髮對媒氏曰誓死不嫁親將所截髮縛成二握分給媒氏用覆二梁之聘嗣後孝事父母潔身在室卒於正統己巳東巖之難

梁衍行妻章氏夫故撫幼養姑喪葬盡道聞於上官旌表其門

鄭守德妻王氏夫亡茹苦終身撫養諸孤俱成立

徐摘

潤詩 半生青鏡紅塵掩一片丹心白日  
懸未拜旌書來上國忽成歸夢入重泉

陶合龍妻鄭氏寇亂夫被害隨母避難金華紡織自給還家訓育遺孤鄉族稱之無閒言

鮑泰義妻曾氏年十八甫舉一子夫亡家貧舅姑欲嫁之答曰甘與子餓死無面目再從人也遂截髮幽居一室紡績以奉舅姑及子長事母亦至孝鄉人以節孝名其居

鄭正蒙妻陶氏初鄭被害死青年守節後報夫仇與子援同殉國難貞而能烈節不忘忠婦德之最優者

貢生王如訓妻俞氏蚤寡勸嫁不從服滿求死以救得甦盡孝翁姑撫孤睦妯娌慈以嚴行鄉族共仰入祠崇祀

廩生鄭汝登妻王氏年二十四夫病顛天請代剖股療治夫故氏無出恩育庶子孝養姑嫜慈和妯娌樛木之賢柏舟之節兩無愧焉

鍾貞女庠生俞翰妻年十七未嫁翰卒鍾聞訃慟哭矢志誓守父母利其別字禁閉在房鍾志操益堅哭不絕口宗族憐之護送至翰家鍾卽孝服依夫靈守制庠生俞欵等呈舉其事上憲各深嘉之著

本縣備粟帛並刊貞女門三字於牌令學博親送至鍾所以旌異之及服闋翁姑貪財亦逼再嫁不從遂減衣食鍾百挫不變邑令訪知飭諭翁姑給米與鍾自爨自全其生族人好義者亦周之令去任翁姑百計逼嫁竟不給米並周者亦屏却之鍾耐飢餒乃泣謂人曰此翁姑必欲致吾死地也吾何生爲哉遂自縊於房越數日面顏如生翁姑以其違己意不報里老呈於縣令適新任頻更事遂寢鄉里哀之

俞文秩妻鄭氏年十七夫故家貧翁逼再醮鄭乃剪髮自誓衣食不給澹如也邑令樂武義令熊並申詳大憲給匾旌表各賜粟帛以天年終

俞文綸妻吳氏夫亡守志冰蘖是期邑令王給匾以旌之

俞烈婦俞源俞思聰幼女浙江通志載陳堯言俞烈婦傳女年十七歸武義庠生王世名世名方飲父仇待時而發明年生子謂俞曰此兒之寄非他人比善撫之命名宗禹居無何斬其仇之頭祭其父投之官遂死之俞慟幾絕水漿不入口邑人韓生與世名故師弟而其媪又俞所視爲母也虞其死

往慰之指其子曰王生遲死六年爲此一塊肉耳  
 忍棄之耶俞憮然曰是誠不可死然又不可不死  
 乃稍就食置王生柩于卧榻前飲食起居一稟如  
 生時三年服闋乃料理其家事集家人輩再拜別  
 囑其子于韓媪絕粒而死時宗禹五歲矣先是王  
 生之死孝也直指上其事議寢不行至俞死因并  
 上其事報曰可建祠立坊曰孝烈

貧民鄭國賓妻戴氏年二十二子甫三歲夫亡翁屢  
 逼嫁不從擇富戶冀其必允迨昇轎至哭泣求盡  
 竟不能強翁犯罪稟官賣氏完贖氏鳴官願以死  
 守前姑歿後姑妬甚困苦萬狀堅志無改年至七  
 十餘鄉黨稱之

章元韶妻王氏麗庠生建春女年二十一夫亡子名  
 士奇方襁褓姑病癱瘓力供湯藥旦夕熨摩姑亡  
 翁偏愛少子分產甚微無以餬口子又天茹茶撫  
 孤孫白首緝繡未嘗去手聞者憐之

庠生鄭應檀妻蔡氏無子素嫻姆訓勸夫納妾生子  
 如春視如己子如春亦盡孝詳孝友傳事聞准入憲綱  
 俱給匾旌獎

鄭中道妻王氏秉性純一年十九夫亡立志孀守一

切慶弔戲嬉不與子甫兩月撫育成立年至六十

邑人楊元喜歌云六十孤燈形影單食冰嚙藥誰能班石可轉兮席可卷剛堅百鍊無摧殘

陳宗遠妻王氏年二十一而寡勤緝繡事舅姑訓子

學賢入泮食廩餼使使者來宣表以靡他二字祝

諭聯云冷室蕭條兩手指頭供歲月孤兒乳哺幾行血淚瀝晨昏入祠崇祀

王仲洵妻戴氏夫亡年二十九父母欲奪其志因其

歸寗陰通富家子謀強委禽焉氏知之潛使婢白

夫弟姪迎歸於是建庵夫墓側置田二十畝供春

秋祀朝夕禮墓如同未亡邑人梁鑄有記入祠崇祀

徐氏德貴女年十六許字蔡士垣子元錫錫天女聞

訃更衣慟哭親弔靈帟歸事父母內縞素外表青

衣誓不改適哀慕成疾越數歲殂

陶明猷妻鄭氏家貧茹淡遺腹六月生子天壽苦志

紡織育子成人克全婦道年七十終

陳承祖妻朱氏年二十夫亡家貧甚紡績度日年近

八十鄉間咸欽苦節

鄭樺妻楊氏年方十八夫故堅守冰霜立志撫孤年

五十餘而終

吳道源妻鄭氏善事翁姑內相夫子夫故撫幼子士

芹娶媳陶氏士芹復天兩世孀居撫孤孫勤紡績

形影相隨歷任表其雙節入祠崇祀

庠生鄭有經妻王氏孝事翁姑撫遺腹子萬言遊庠

自二十一矢志柏舟以至今稀首不膏沐身不衣

帛飛蓬麻履苦節堅貞申詳院道批入憲綱入祠

崇祀

祝士奇妻章氏舅姑早逝夫亦繼亡家貧紡績齒積

數金贖夫田一畝五分將翁姑夫靈送寶勝院存

祀崇禎末氏年四十三恐兵入境有玷貞操遂備

棺沐浴更衣登樓自縊本府徐公旌其玉節

庠生鄭毓英妻王氏年二十五夫亡遺孤二週撫養

成立孤燈教讀子炳克承母志入庠食廩餼母儀

洵無愧云

鄭正浩妻陶氏年二十三夫故孝事姑嫜二親連喪

喪祭盡禮有庶婢遺腹六月生男嘉善撫若親生

教育遊庠食餼壽至六十九

鄭日章妻吳氏年二十六夫亡翁姑繼歿殮無資

宗族憐而周之立繼承祧撫若親生壽登七十

潘高聘妻鮑氏夫故撫育遺孤孝事翁姑紡績以養

年七十五又督訓孫文韶遊泮食廩後登賢書入

祠崇祀



陳福祥妻鄭氏年二十七而寡孝翁姑和妯娌淡泊自甘一切慶弔不與苦志撫孤壽六旬家聲永肅庠生章元器妻盧氏年二十二夫故立志撫育兩子正廷正典正廷方娶而卒媳陶氏年十六有遺腹子矢志靡他姑媳雙節人無閒言入祠崇祀

余氏庠生鄭有哲母苦守家貧績紡度日教子入泮八十而終

鄭維珪妻戴氏紡績助夫膏火年二十夫亡子女繼天姑欲嫁之誓不改節奉姑彌謹壽登八十三

監生戴繼陽妻吳氏年二十夫故遺孤君贊方三齡

氏守志撫孤延師訓課遊黌序貢成均郡伯給匾曰守貞毓秀入祠崇祀

庠生鄭兆昌妻陶氏守夫節養繼姑遭世變備歷艱辛卒能教子應祥遊庠入監當道交獎入祠崇祀

潘良生妻徐氏事孀姑孝閩變隨姑避蘆瀆夫病割股救不愈引刀刺喉死時年二十三

庠生章正桂妻陳氏孀居子自蘊又天與媳盧氏同守一門雙節當道交獎入祠崇祀

梁元雄妻鄭氏年二十三夫故撫子方壯而歿孤苦萬狀矢志靡他族人祚璿周恤其口食者十年及

卒具棺合葬以慰貞魂

鄭光文妻祝氏夫亡二十餘年水霜彌潔邑侯旌之  
鄭光斗妻鮑氏夫亡年二十有二僅遺一女以柏舟  
自矢邑人梁祚璿有傳

潘煥明妻蔡氏年少守志伯燦明經理其家氏惟紡  
績教子不出里門壽登八十一恩綸崇祀

庠生陳與發妻章氏夫故奉姑盡孝子憲章又歿獨  
以一身爲未亡人撫育幼孫家聲不墜各憲旌獎  
庠生祝世葵妻鄭氏年十九夫故子幼未幾子天矢  
志益堅終身無玷入祠崇祀

潘文豪妻劉氏志士女也豪故卽欲同棺鄰女勸止  
後姑欲逼嫁取聘爲二子娶婦氏適有孕四月不  
得已投繯死里人李仁灼有詩哀之

李塾妻邵氏夫卒孤幼家貧紡績教繡度日後以女  
婚不定致訟自傷夫故無主投繯死子應香年甫  
十三隻身葬母族黨稱孝

庠生潘哲生妻陶氏年二十五夫故子幼壻與嫡侄  
俱孤幼無倚撫之如己出延師訓育成材可謂節  
義兼優者年七旬終

俞有望妻葉氏年二十八夫故遺子亮甫四齡甘心

苦守藜藿不充躬勤紡績教子遊庠食餼與伯氏  
姪梅臣同居無析產意家產被費殆盡亦無怨言  
歷任旌獎報憲有案

吳德官妻祝氏秉性溫淑夫故堅守節操奉老育幼  
時稱閭範邑侯旌獎

吳汝益妻俞氏年二十六夫故秉節持家安厝舅姑  
而以義方訓子孫享壽八旬侯邑宰旌匾云歐節  
龐齡

庠生吳永英妻陳氏年二十七夫故端莊靜一孀守  
寒帟撫孤娶媳教養多方周邑侯以玉骨冰心獎  
之

庠生吳伯達妻葉氏年二十七而寡矢志靡他教育  
二子永泰永佑並遊膠庠弓裘克紹壽至七十有  
七于邑侯旌其門

庠生吳永佑妻祝氏二十九歲夫卒子宗楷宗樑皆  
未成立氏克保遺產備極恩勤宗楷貢成均宗樑  
遊黌序及宗楷亦逝遺有弱媳幼孫氏年近六旬  
仍勉力維持雷邑侯給匾旌之

庠生鄭起敬妻潘氏年二十九夫故遺二子鄭仁鄭  
德俱幼氏堅志苦守勤儉持家延師訓子並遊黌

序孀居三十載內外無間言歷任邑侯屢給旌匾  
庠生陳憲章妻徐氏夫故奉姑盡孝子九韶延師教  
育甫入泮亦故遺有弱媳幼孫賴其培植撫養克  
繼家聲歷任縣尹莫不旌獎

廩生祝啓鳳妻潘氏年二十七夫故姑亦隨逝翁庠  
生復祥久患羸疾子萬厦方弱齡氏夜操井白日  
採山薪竭力事翁湯藥不懈及翁歿喪葬盡禮子  
未冠遊庠食餼皆氏教有力也雷邑侯給匾旌之  
貢生吳萬有妻祝氏年二十七夫故遺三子俱弱齡  
上有孀姑六旬餘凡養老育幼氏以一身肩其任

鄉里稱賢

生員劉凱妻陶氏居金川幼通詩禮有小班昭之名  
年二十九無出繼養二子俊德崇德夫故逾月生  
遺腹仁德氏教養維勤崇德遊庠命蹇三子相繼  
俱亡復能撫育遺孫不失舊業其陶姓宗支式微  
一綫單傳亦賴其周全無患洵爲節孝兼優者建  
坊北門入祠崇祀

廩生俞亮妻祝氏年二十九夫故遺二子啓斌文煥  
皆未成立氏守節撫孤教養備至啓斌爲庠生文  
煥爲廩生成歲貢孫其璿亦遊泮邑侯靳讓周崇

高皆給匾旌其門

庠生陶舉妻王氏因夫年邁無子勸娶妾何氏亦無出及夫故氏年二十有七繼立本族陶三吉為嗣娶媳生孫以綿宗祀孀居二十九載鄉里無閒言歷任邑侯給匾旌之

庠生祝長生妻王氏夫故遺孤象龍年甫三週氏守節訓子家法綦嚴象龍遊泮孫尙仁尙義亦克繼書香鄉里稱之劉邑侯詳憲有案

節孝祠內木主已入祠者四氏

舊志未載事實無考今依木主補載

吳時章妻范氏

吳士芹妻陶氏

陶應瑞妻鄭氏

陳正色妻章氏

庠生鮑嵩年妻潘氏元韜女克端婦道姑亡翁老病將危醫藥罔效乃焚香告天割股以療之孝聲震動一時

庠生潘子儀妻鄭氏年二十八歲夫故勵志堅貞撫訓二子嘉謨嘉賓不少姑息長入郡庠幼入邑庠嘉慶間具題奉

旨建坊旌表年七十四而終

章經天妻鄭氏年二十二夫逝守節言笑不苟足跡未嘗出戶庭邑合王者賢以勁節流芳麗邑合陳

誥以松姿栢操給匾旌獎壽八十三而終

章鴻軒妻徐氏年二十八而寡守節堅貞年四十二而卒未嘗見齒

章鴻瑄妻梁氏年二十九夫故苦志孀居壽七十五而終

儒童章鴻志妻周氏年十六適志十八夫故淑慎堅貞邑令耿維祐贈孝義兼全額府尹方維祺贈以松操彌勁額嘉慶十五年具題奉

旨建坊旌表壽登八十三而終

陶發雲妻鄭氏二十二歲而寡孀姑在堂紡織以事朝夕敬謹始終無間一子名繼緒入武庠壽至八十族里咸稱道弗衰

儒童俞聖猷妻徐氏年十七適猷二十二而寡結縵六載夫以苦讀得瘵疾徐侍奉勤謹無間須臾夫故無子翁姑齊眉未忍捐生高堂甘旨婦代子職閭里稱孝以夫兄次子國球入爲嗣成名後相繼而亡撫育孫枝入國學壽逾週甲道光五年題奉

旨建坊旌表

武生孫時芳妻潘氏幼嫻閨訓言笑不苟十八適芳二十九而寡夫無兄弟翁姑在堂備及孝敬姑先

翁後養生送死盡禮盡哀一子基業訓誨成立入國學道光五年邑令李增福詳請具題奉

旨建坊旌表

廩生潘德儒妻陳氏秉性幽閒視躬淑慎二十八歲夫故茹苦泣血躬勤紡績翁姑衰邁孝養無懈壽臻八十餘長子忠精年方幼稚次子忠粹遺腹生課讀綦嚴均成名道光五年具題奉

日建坊旌表

邑令胡霖蒼有贊其畧云賢哉潘母節孝無雙女箴久凜聞範素彰敬侍夫子鴻案相莊彼蒼不吊黃鵠遽傷柏舟自矢志凝冰霜鐵烈雪潔寒梅並香持家政肅訓子名揚或入仕版或列泮庠諸孫繞膝蘭桂成行輝頌彤管寵錫鸞章

劉邦彥妻陶氏二十七而寡家計窘迫親操井臼苦

守不二撫子教孫孫入邑庠壽至八十七而終

俞承浩繼妻劉氏選貢宗煥之生母也年二十適浩

二十九而寡煥甫九齡次子烜方四齡一女五月

家產甚薄零丁孤苦浩堂弟等凌逼不堪邑令張

訪究劉以撫孤忍受不願赴公庭躬操絰作畢事

婚嫁訓子慈嚴並至子成名後待凌逼者仍以禮

而凌逼者轉相敬服年近八旬猶康健如常已見

四代人稱賢淑

潘德炎妻蔡氏年十九適炎甫四載炎故遺孤忠聖

自襁褓中撫教成立媳亦蔡氏年十八于歸二十四而寡有二子姑媳苦志甘守紡績撫孤悉爲婚娶媳事姑克謹姑守四十餘載而卒媳守三十餘載今已見孫一門雙節宗族鄉黨均無閒言

庠生蔡敏文妻潘氏年十九歸文二十八文故上有繼母馮氏在堂潘孝養不輟以壽終誨子謹嚴不事姑息長子維忠次維孝均食餼三維恭暨孫均入邑庠守節三十餘年而終鄉里賢之

監生陶錫齡妻祝氏年二十七夫故乏嗣志堅守節不再適家甚貧緝繡易粟以自食四十餘年如一

日苦節著於鄉里

儒童鄭毓琳妻鮑氏年十九琳故遺腹一子百年成立初業儒氏因多病令子習岐黃頗專精孝事翁姑俱年臻耄耋氏年七十有二已見四代邑令李增福黃維同俱贈額

儒童俞新旂妻金氏年十七臘月于歸夫已病瘵侍奉湯藥不少懈十九歲二月夫故扶棺慟哭幾不欲生矢志苦守翁姑憐之爲旂立後金擇夫兄思文次子廷璐爲嗣抱養成立孝事翁姑以天年終鄉里賢之



監生俞國顯繼妻葉氏年十七于歸時夫療病已深莫可救治葉調湯藥必親奉侍半載夫亡誓守無貳前妻徐氏遺二子長萬春方七齡幼萬清方四歲葉撫育教誨嚴慈兼至今二子均入膠庠守志二十餘年人稱賢淑

鄒永有妻曾氏二十而寡長子祖漢甫三歲次子遺腹撫育成立苦節貞志三十餘年如一日時姑尙在堂遇歲歉已與子食皆粗糲必求精鑿以奉姑姑以天年終鄉里咸稱貞孝一無閒言

監生俞德培妻湯氏年十八適培幽閒靜淑婦道克敦產一男旋天二十七夫病篤止一女問其所志誓以身殉夫曰我父母早喪依叔成立且二代俱長今無弟又無子姒續大事悉賴汝身以定古人云死節易撫孤難汝當爲我任其難者湯泣然始諾及卒苦志自守足不越閫已逾二十餘年貞節之聲播諸里族

武生沈繼禹妻吳氏二十二而寡秉性貞靜苦節自守雖宗族罕見其面躬親炊臼紡績紉鍼二十餘年無稍逸人稱淑慎繼一子廷珍國學生咸豐元年具題奉

吉建坊旌表

庠生王陳誠妻陳氏年十七適誠克敦婦道三載夫  
沒氏慟不欲生時遺腹未產姑泣勸之乃止子名  
張德訓誨成人入國學年五十四而卒

王發聖妻鄭氏卽王陳氏之孫婦也善事翁姑相夫  
勤謹二十四歲而寡時姑歿翁存遺腹生一子陞  
朝事翁孝敬教子嚴慈並用入國學壽至八十二  
三代兩嫠撫孤遺腹鄉黨稱之

職員潘如龍繼妻陳氏年十九夫故前妻遺二子永  
齡永祥年俱幼穉訓誨成名事翁姑以孝聞次媳

吉建

雙節坊旌表今長子登榮由廩貢報捐教職同治年

間歷署嚴州府桐廬縣教諭衢州府常山縣湖州  
府武康縣訓導次子登華亦列成均皆母教也現  
其母年逾古稀康疆無恙族黨欽之

儒童潘成仁妻王氏二十而寡繼一子克教自幼撫  
養長入武庠氏堅操不改勤儉持家三十餘年如

一日

周家鋌妻陳氏年二十八夫故誓無他志閭里稱賢  
二子長國伉次國儷克遵荻訓俱登國學

章會文妻潘氏年二十六夫故遺腹六月產子家球  
誨育成立侍奉翁姑咸以孝稱宗族賢之

章師文妻徐氏年二十三二月于歸六月夫故矢志  
柏舟母欲奪其志多方拒絕撫夫兄子奎爲嗣延

師教育遊庠食餼鄰里欽仰焉

鮑元英妻潘氏夫早喪自矢堅節邑令范給匾旌其  
門曰操勵冰霜

監生周國儷妻曾氏二十七歲夫故敬事寡姑有三  
子延師教育長邦俊登國學次邦傑列邑庠三邦

佐補增生道光二十九年邑令李詳

憲請旌入祠崇祀現年七十有六

庠生鄭尙仁妻祝氏青年守志勤儉持家有二子延  
師教育長子賓華理家務次子賓愷補增生三子  
賓睦從九銜守節四十餘年以壽終

庠生鄭尙鵬妻陶氏年二十九夫故堅貞自矢足跡  
不出戶庭有一子賓模延師課讀已獲采芹守節  
四十五年無疾而卒

鄭賓錢妻王氏年二十八夫故有二子孀居自矢撫

養成立現守節已三十餘年常如一日里黨交稱之

增生周邦佐妻梁氏二十九歲夫故誓志堅貞繼二子長西銘次西仁延師育子俱得成名孝事寡姑始終如一宗族鄉黨皆稱其賢

儒士沈如川妻鄭氏青年孤寡苦志孀居現年五十貞節之聲播諸族黨

國學生鄭維新妻王氏年二十九而寡勤儉自持勵志堅貞子一名榮軒教育成人亦列成均現年五十歲

監生梁廷勳妻鮑氏年二十四而寡無出苦志孀居足不越閫首不膏沐身不衣帛二十餘年常如一日繼一子教誨慈嚴並至遠近欽仰現年五十二歲

邑庠生陳夢祥妻湯氏係已故武義縣湯景沂之女素讀書解識文字于歸後孝事舅姑咸豐辛酉粵匪竄邑氏隨舅庠生陳巨源及仲叔姒吳氏避亂於武義之大來口山中賊搜擄入山逃避不及將執舅與姒氏佯謂賊釋舅與姒請以身事賊窺氏有令姿遂釋之氏遙望舅姒下山去已遠輒罵賊

宜平縣志 卷之十一 十一  
奪刀自刎氣絕血不溢色不變賊駭遁是年夏六月二十三日也氏年四十有八歲越數日舅及妯娌還山獲其屍哀而葬焉孝烈兼備遠近共欽

民人章金餘妻李氏係已故邑庠生李樹元之女年十八于歸孝事舅姑勤儉佐家夫病纏綿湯藥弗懈咸豐己未新正三日夫歿氏痛哭誓不欲生奉姑命強起守志自矢篝燈紡績常勤女紅繼一子名清淇教養如自己出氏現年五十六歲

廩生俞思敬妻董氏夫卒矢志撫孤教子廷振入泮成名咸豐元年請旌

增生俞廷濟妻陳氏二十八歲夫亡事姑撫孤孝慈備著子名士珍補廩膳生

職員俞開鐘妻王氏二十歲夫亡捐鉛華謹操履鄰里稱之守志十九年卒

俞良應妻王氏咸豐辛酉十一月二十六日粵賊搜牢氏義不受辱罵賊遇害

俞名還妻徐氏夫亡遺腹生男勤謹撫育冰蘖自勵守志三十七年卒

俞士貢妻陳氏夫亡紡績自活食貧不怨卒於同治十年鄉里憫其苦節

庠生李雲驤妻巫氏二十六歲夫亡有一子氏守志撫育成人氏現年六十三歲

監生陳啟文妻聶氏二十九歲夫故僅有一女孤苦自守並無異志貞潔之聲達乎里黨現年五十一歲

監生沈廷璠妻俞氏青年守志夫故五子俱幼撫孤勵節勤儉持家內外無間言延師教子浩川柳川德川俱已成名現年六十一歲

潘克諧妻鄭氏咸豐十一年十一月賊大股至逃避不及懼受辱跳夫人殿潭身死里族咸仰其貞烈

鮑文鍊妻周氏年二十四咸豐十一年夫為賊擄有一子氏矢志自守撫育成人現守節二十餘年人稱賢淑

鮑之昭妻龔氏年二十一夫故無出咸豐十一年賊至夫被擄氏孀居自守善事寡姑貞孝之稱遠近無間言

西塘王舍克女名春球年及笄被執不行母吳氏與叔姒傅氏見女被擄憤與賊爭俱被殺女大罵不絕賊殺之

吳海旺女年方笄與嫂林氏俱被執賊欲擄至縣路

經大溪口賊入村劫掠使女坐路亭女相謂曰吾等從賊必無生理與其受辱而後死不若全節而早亡遂俱投溪水死

庠生潘祖文妻李氏年二十九夫故有二子矢志守節撫育教誨長宗慶登國學次殿麟入邑庠年臻八十以壽終

潘康人妻富氏年二十七夫亡有二子一女苦節自守撫養婚嫁三十餘年如一日內外無閒言

范陳福妻涂氏生一子二十一歲而寡敬事孀姑撫養孤兒孝慈兼備貞潔可風鄉里賢之

殿下廸朱遠球妻祝氏年二十六夫故幽閒貞靜克守婦道閨門無玷現年五十二歲守節二十七年  
涂承元妻曹氏年二十四夫故克遵婦道矢志柏舟繼子開棠教育人監年八十五歲卒

宋光海妻傅氏年二十夫故青年守志咸豐十一年遇賊母子二人殉難死年七十餘

潘啟賢妻涂氏年二十二夫故一男名永慶青春守志現年七十

潘茂榮妻涂氏年二十六夫故守志年七十二歲卒  
王老克妻范氏年二十五夫故守志現年五十九歲

張高興妻林氏年二十一夫故青春守節苦操井臼年六十八歲卒

西塘沈廷鑾女名火球年十九未嫁咸豐辛酉被掠堅不肯從哭罵不絕口賊怒殺之

西塢王根元女年十八未嫁咸豐辛酉被掠不從殺之

西塢王恩武妻董氏年十八夫故子女一甫離襁褓撫孤守節妯娌和睦閨門無玷年八十四歲卒

席涂朝妻吳氏年十九被擄不從溺死於大溪口賊割其乳

湯山監生陶文蔚妻年二十夫故一子甫晬勤儉持家孝事翁姑現年四十六歲守節二十六年

潘啟源妻曾氏年六十九被擄口罵賊子賊以鎗刺其腹死

宋光貴妻鄭氏年四十餘被擄殺於深山

鄭珍培妻吳氏年十八被擄不從溺死於大溪口賊破其腹

鄭文選女名雲定年十八被擄堅志不從溺于大溪口爲賊剖腹乳死

陳玉琬妻潘氏年二十七而寡有三子幼甫襁褓氏



撫養成立誓志堅貞終身不苟言笑人稱賢淑

監生陳觀德妻鄭氏二十六歲夫故有二子長又殤

祇一子氏撫養成人現登國學翁姑在堂年力衰

邁氏善事之守節二十年無疾而卒

徐炳茂妻陳氏年二十八夫故一子名大芳娶媳黃

氏祇生一女無何子又亡咸豐十一年賊至叔被

擄孀亦旋卒祇一姪氏撫如己子卽爲娉娶與媳

黃氏共矢貞潔一門雙節里黨欽之

監生鄭占星妻涂氏年二十一夫故矢志守節子甫

七月撫育成立童年遊庠學憲徐給義方教子匾

額現年四十七守節三十六年

何明韶妻劉氏年二十八夫故守節現年五十八歲

何明鶴妻鮑氏年二十三夫故守節現年四十七歲

何文發妻鄒氏年三十一夫故守節現年七十八歲

葉傳仁妻朱氏年二十四夫故守節現年六十五歲

潘克孝妻鄭氏年二十八夫故守節現年五十八歲

潘成灝妻王氏年十九夫故守節四十八歲卒

增生陳典章妻潘氏年三十夫亡紡績教子不出戶

庭人稱淑慎壽七十七而終

陳永進妻潘氏年二十四而寡家貧子幼甘心苦守

撫養成立壽至七十歲而終

陳正田妻周氏年二十八夫故秉節持家勵志無懈  
現年六十二歲

潘國賢妻邱氏年二十七夫故堅守節操克全婦道  
邑令李申請大憲旌表其門

監生潘其漣妻湯氏明大義無子勸夫納妾施氏及  
咸豐辛酉避難山林聞賊至恐玷貞操湯投澗死  
施亦自縊鄉里稱其雙節

監生潘其源妻陳氏青年夫故秉性貞靜持家教子  
閭里稱賢年五十三而終

武童潘華鼎妻鮑氏青年夫故秉性純一紡績撫子  
始終無懈現年五十餘歲

儒童潘華文妻陳氏年二十九而寡遺一子苦志撫  
育泣血終身人稱賢淑現年五十餘歲

潘壽國妻饒氏年二十九夫故遺二子俱幼堅志苦  
守撫養成立現年五十餘歲

潘福洋妻鮑氏青年夫故淑慎堅貞立志撫孤鄉里  
賢之現年五十餘歲

鮑宏緒妻陳氏青年夫故守節終身訓誨二子俱已  
遊庠現年五十餘歲

鮑明鐸妻吳氏青年夫故茹苦終身撫養諸孤俱已成立現年五十餘歲

潘壽頤妻邱氏青年夫故持家教子矢志癡他現年已七十餘歲

鮑三山妻陶氏青年夫故堅貞自矢克全婦道壽終七十一歲

庠生潘成渝妻陳氏年二十九夫故守節子一撫養成立勤儉持家冰霜勵志成豐四年邑令李具題奉

旨入祠建坊壽登九十一歲

庠生江起蛟妻鄒氏生二子年二十九夫故守節善事孀姑克盡孝養教子成名長德孚貢成均次德佩入太學年四十七而終

監生王毓灝妻俞氏年二十八夫故矢志靡他一子廷樑甫弱齡撫養成立入邑庠壽逾七旬猶勤紡績閭里稱之

庠生李任賢妻陳氏年二十五夫故無子守節不變貞潔可風現年六十一歲

王金球妻陶氏年二十七夫遭寇殉難子壽康尙幼守節撫孤教育成人已入學治家肅而勤儉置產

宣平縣志 卷之十二 列女 三十一  
築室皆獨力支持現年四十四歲

王士文妻潘氏年二十七夫故子僅三歲茹荼撫孤善事舅姑閭里交稱現年五十歲

王秉餘妻陶氏年三十夫故守節織紡自給茹苦安貧隣里憐之現年六十二歲

曾繼球妻潘氏夫病氏割股以奉夫故年三十二茹荼撫孤事舅姑孝言笑不苟壽至七十五歲

廩生蔡惟孝繼室鄧氏夫故年二十八子錫申甫九月矢志撫孤茹荼飲荼治家勤儉以紡績課兒讀錫申入學食餼氏現年五十歲

潘攀桂妻沈氏性端莊不妄言笑攀桂應試歸疾不起氏痛哭絕粒求死者數矣姑曰吾老矣既喪子又喪婦是重累我也且汝無子盍計立後氏乃不死繼姪金睦爲後事姑孝處妯娌和自奉儉以其餘周貧乏人咸欽之辛酉賊搜山氏語人曰吾不遇賊則已遇賊必死不以皎然之身爲死者羞也俄賊至繼子被擄氏奮袂投水死年三十三二十餘日賊退時尸骸相枕難識惟氏色不變衣窮袴褶帛縫密不解同治間具題奉

旨建坊旌其門曰節烈

鄭榮仁妻涂氏年二十一歲咸豐辛酉粵賊陷城避  
亂於山下鮑山中賊搜山榮仁擄去氏知夫已被  
擄輒連聲罵賊趕至半途不及遂投崖而死

梁紹晉妻孫氏年二十九夫故守節現年五十八歲

梁儒範妻陳氏年二十六夫故守節沒年五十歲

梁毓相妻陳氏年二十四夫故守節沒年四十七歲

章家進妻陳氏年二十五夫故守節沒年六十七歲

章錫貴妻蔡氏年二十六夫故守節現年五十五歲

武生江迴瀾妻楊氏年二十七夫故守節現年四十

九歲

廩生陳憲成妻湯氏年二十九夫故守節壽終六十

四歲

庠生陳烜妻湯氏年二十一夫故守節壽終七十

八歲道光二十九年邑令李具題奉

旨旌表給扁節勵冰霜

王根廷妻陳氏年三十夫故家貧子幼孤苦自甘並  
無異志鄉里賢之

道光三十年咸豐元年兩次由浙省採訪總局具詳

彙題請旌

楊氏監生章師孔妻 鄭氏饒德荆妻

何氏章慎天妻

梁氏鄧正經妻

傅氏張坤槐妻

邱氏潘榮傑妻

聶氏梁金祥妻

楊氏吳宏義妻

潘氏俞有壽妻

許氏陶昌盛妻

宋氏潘汝貴妻

曾氏何學照妻

朱氏李希修妻

李氏何之禮妻

黃氏梁敦厚妻

朱氏鄧正綱妻

潘氏庠生吳庭芝妻

吳氏周光福妻

湯氏陳國時妻

湯氏陳大文妻

龔氏徐明理妻

周氏丁上海妻

周氏何學詩妻

陶氏庠生潘騰蛟妻

陳氏江廷瑞妻

徐氏潘朝穆妻

何氏俞有泰妻

陶氏鄭成俊妻

湯氏陳憲成妻

傅氏宋光海妻

陳氏王鄭柏妻

陳氏李易株妻

潘氏曾仁達妻

王氏潘忠廷妻

何氏李可顯妻

高氏陶遜虞妻

徐氏鄧正芳妻

潘氏項良臣妻

姜氏溫孔彰妻

陶氏高理富妻

李氏王時雲妻

吳氏曾起宗妻

陳氏庠生梁概妻

吳氏監生梁大頤妻

夏氏項良英妻

曾氏陳士明妻

吳氏鄭漢賢妻

楊氏潘公禮妻

劉氏俞立型妻

江氏陳邦浩妻

咸豐戊午辛酉之變婦女殉難死節者自不乏人其

由採訪錄報會奉部議入祀忠義均附書焉

鄭氏陶水方妻

周氏陶連喜妻

李氏陶根賢妻

鄭氏王宏林妻

潘氏李文南妻

鄭氏俞文學妻

項氏廖忠厚妻

吳氏鄭獻貴妻

大姑鄭文選女

吳氏席麻里妻

傅氏王 苟妻

鄭氏陶永中妻

周氏陶允生妻

程氏陳立興妻

吳氏陶賢慶妻

趙氏吳逢熙妻

鄭氏王細告妻

雷氏鍾謝客妻

陳氏高廷瑞妻

邱氏高省芝妻

朱氏高老二妻

吳氏曾福文妻

大姑王根元女

鄭氏王海賓妻

鄭氏潘竹舟妻

夏氏劉宗理妻

大姑程老五女

大姑劉開學女

鄭氏潘銀海妻

陳氏高理錦妻

沈氏潘奴才媳

鄭氏三老克母

王氏俞宗浩妻

王氏劉老三妻

阮氏劉老二妻

徐氏劉阿保妻

潘氏王月有妻

鮑氏陳炳會妻

吳氏曾子椿妻

周氏呂金有妻

大姑呂金有女

章氏陶水法母

程氏章老培妻

湯氏李文賢妻

王氏何壇海妻

鄭氏李金滿妻

林氏李君祿妻

鮑氏李應奎妻

鮑氏陶土樹妻

咸豐辛酉之變民婦死節者三人未經採入忠義因並書之以表貞烈

吳氏江坑會益忠妻

周氏江坑會起榮妻

陳氏趙村鮑章貴妻



宣平縣志卷之十三

藝文

遺文故實可備覽觀紀事題詠或附或刊著述無多  
弁之簡端述藝文志

遺書

宋

遠堂集 梁安世著

救荒錄 朱子仁著

菊平子集 梁泰來著

元

論語翼 梁椅著

滄江漁唱集

周易附註

五行五事辨

象物篇 以上俱梁淳瀾著

皆山集 梁惟厚著

明

燕山集 潘彰著

槐溪吟稿

詠史稿 以上俱吳庭槐著

槐屋集 高著

樗叟吟 梁楚著


國朝

燕遊草 王祚藩著

抑齋集 李灼著

味道集 梁璠著

懷松軒竹前集 鄭之鰲著



敕

唐

贈葉法善越州都督敕

敕故道士鴻臚寺卿員外越國公景龍觀主葉法善天  
真精密妙理元暢包括秘要發揮靈府固已冥默難原  
希夸罕測而情棲蓬閭迹混朝班保黃冠而不拔加紫  
綬以非榮卓爾孤芳冷然獨往勝氣絕俗高風無塵金  
骨外襲珠光內映斯乃體應中心名升上德朕嘗聽政  
之暇屢詢至道公以理國之法數奏昌言謀參隱諷事  
宣洪益歎徽音之未泯悲形解之俄留何莫愍遺殲良

奄及永惟平昔感愴於懷宜申禮命式賁泉壤可贈越州都督

宋

封金紫光祿大夫陳庫敕 建隆二年

區宇載安既克輯甯之効邦家爰定當推翊戴之勞纘謨已著崇勲錫爵當明盛典前朝監察御史陳庫合陞金紫光祿大夫殿中侍御史特進上柱國位膺顯要納言邇挹清光職隸糾繩執法廉加肅政乃修益懋是進奚忘

御葬金紫光祿大夫陳庫敕 淳化五年

朕承先帝丕緒實受上帝洪禧舞干羽於兩階雖苗民之是格奉玉帛者萬國化僭偽之悉歸庶績咸熙百僚稱事推濬源之流慶誠世澤之積勲號建宋朝祿受周禪奉其太皇太后之為母安得彼卿彼相之非臣周朝襲封金紫光祿大夫殿中侍御史陳庫世任名卿身膺顯爵雖未受當朝之職每欽承遜位之心曾服祖皇方喪奏立周朝世祀念不忘舊命奉維新訃聞物故合致奠儀今差免解進士將士郎馮价就經監史吳瑀家同奉敕旨著令有司卜地安葬故茲詔爾主者施行

封靈虛見素真人敕 宣和二年

宣平縣志 卷之十三  
二  
敕曰體妙道以治身暢淳風而撫世凡號高真之侶每  
興歸往之懷見素真人葉法善太極仙卿枯蒼羽客掃  
妖兇而馘滅救魑魅以驚奔故在開元之間屢示化人  
之迹深莫可測本皆自然惟見素之強名具治平之前  
詔景仰何已嘉崇敢忘申賁靈虛用彰微妙可特封靈  
虛見素真人

封仁烈侯敕

敕靈顯廟神章承趣朕聞有唐乾符巢賊肆虐麗水幾  
危爾以智勇力捍鄉井其歿也遂血食焉迨於國朝靈  
跡益著殄寇于宣和止潦於紹興其大者也頃歲耄俛  
尤視以爲司命茲採民言昇之徹侯錫之嘉號是亦足  
爲冥冥之助歟可特封仁烈侯

封助順夫人敕

敕靈顯廟神妻呂氏麗水有祠靈甚蓋存與歿俱力于  
捍寇昭昭冥冥不可誣也民甚敬事驗之碑誌以爲有  
淑德之助使者以聞爰畀魚軒益大湯邑以彰休烈其  
尙歆茲可特封助順夫人

封仁烈侯四婿敕

敕靈顯廟神婿丁鄂等陰陽不測之謂神而有奔走有  
先後則其神靈爾等四神附食於處之靈顯廟人稱爲

仁烈侯之四媚凡侯之救災弭患逆風雷雨皆四神實  
輔之士民合祠以陳朕何愛一爵而不以彰厥靈乎爰  
各啟于初封尙其閱於爾施可特封仁烈侯告廟文附  
至仁福佑民生以武烈保全鄉社惟夫人淑德成順助  
之功用在能血食一方神靈奔世蒙休之衆感恩滋久往  
者列請於朝上求封典惟聖天子察民之請采神之事  
爵以侯諡曰仁烈以夫人諡曰助順寵錫褒辭肆頌誥  
命某等悉心遠迓稽首望塵捧歸神廟虔備庶羞恭行  
三獻於以侈聖天子之賜爲士大夫之慶庶幾效旣往  
之報迓方來之庥夫蒙恩而不忘報神民之誠也受報  
而益以福民神之事也以今日之隆爲百世之禱惟神  
其鑒之

### 賜處士蔡子昇敕

方臘洪載結連兇黨凌辱我衣冠屠殘我士慶奪郡邑

擾鄉閭爾義勇蔡子昇者惟懷報國之智力爲正復之  
謀孜孜務恤於生靈耿耿忠貞於王國起義兵屯據東  
巖從王師掃除叛賊冀安民而保族全忠孝以傳家朕  
固爵褒三辭不受願爲隱逸之游志入東巖之島但斯  
志不可奪以成其令名今特敕封處士賜號懿德以旌  
之可依前件奉行

### 賜開國伯梁汝嘉敕

朕惟內閣之嚴用闕祖宗之謨訓而學士之重實儲天  
下之賢才就正班聯式旌治効寶文閣直學士右朝請  
大夫知明州軍事兼管內勸農使兼兩浙東路沿海制

置使開國伯食邑九百戶賜紫金魚袋梁汝嘉氣冲而裕識敏於明中外踐揚聲績茂著文昌分職蚤列於六卿民部疇庸游升於八座逮均勞於輔郡旋報政於中朝易畀東藩之雄仍作西清之序其錫書以贊庸示眷懷尙究乃心克祇予訓可特授依前封賜如故

加封開國公梁汝嘉敕

周官馭貴爲八凱之先虞典陟明限三年之久朕若稽往制恪守彝章儻庸歷之無愆在陞崇而敢後寶文閣學士右中大夫提舉江州太平興國宮縉雲郡開國侯食邑一千八百戶食封一千戶賜紫金魚袋梁汝嘉授

材膚敏賦性疏通彈壓推天宰之能斷制藹地官之譽粵從均秩傍彭澤以奉祠屢沐殊恩割縉雲而錫壤會茲歲課已應邦常其陞一品之官仍命八座之爵往哉祇服嗣有寵褒可特授右中大夫依前寶文閣學士提舉江州太平興國宮進封開國公加食邑三百戶食封如故

賜温州司理參軍蔡伯尹敕

朕惟君臨四海務宵旰以爲民任簡百司斯德心而立國才裕斯澤溥事績則效宏爾筠州新易主簿蔡伯尹者慎靜恭默寬厚慈祥興教化修政治撫百姓利萬物

宣平縣志 卷之十三 三  
此爾之賢能知道誼識安危別賢愚辨是非此爾之明  
察職經爾考謀猷不負甲科官洽羣生惠愛已聞朝宁  
曩悼丁祖母憂甫得服除趨闕恩加超擢念軫隆施茲  
特敕爾爲温州司理參軍用展康濟之謨益佐昇平之  
畧可依前件奉行

賜宣國府錄事參軍蔡伯尹敕

秉道事君著寅恭之大義推心輔國敷勞勩之豐猷爾  
温州司理參軍蔡伯尹者名薦賢書職膺寮案庶政與  
庶獄畢舉治人同治道交修無倚勢以作福威無怙法  
以恣深巧寬和爲理德讓有孚循吏之稱達於丹陛良  
牧之頌淪乎蒼生茲特敕晉爾階修職郎宣國府錄事  
參軍當官慎勤敷政清謹庶膏澤之永戴俾寵榮之益  
申可依前件奉行

賜陞狀元蔡仲龍敕

朕惟選賢輔國經緯之業崇列職涖官治安之功懋實  
關氣運在簡帝心今殿試榜開而狀元蔣重珍已故爾  
蔡仲龍者掇名第二朕閱試策文章精蘊學術淵源進  
陞爾爲狀元荷非常之榮承不次之寵詞臣冠冕秘館  
琬炎靖志以效敷陳虛懷而備顧問已掄擇得雋宜錄  
用稱才賜綠袍鞞笏瓊林宴御製詩一章跡邁凡流褒



踰異等茲特進爾階承事郎國史院編修之職錫之敕  
命於戲玉札輝煌宇宙覩文明之雅化金門高遠英賢  
攄顯赫之精忠克守官箴聿成治體以副朕望爾其欽  
哉

賜大理寺卿兼端明殿學士蔡仲龍敕

朕惟列職朝廷必選文學之士掄材鼎鉉欲爲調燮之  
司托腹心以贊猷資正直而匡理今崇文觀祭酒蔡仲  
龍者秉心端確律志忠良正色立朝百僚仰其師表公  
心執法羣度式乎章程抱尊主庇民之奇謀敷經邦濟  
世之嘉績以此顯名特加擢任今敕爾爲大理寺卿兼

端明殿學士賜紫金魚袋金紫光祿大夫正治上卿爾  
當恪遵職守崇飾化原白簡凝霜莫負慎勤之事金章  
耀日用彰彈擊之風國運重華台衡濟美爾其欽哉毋  
替朕命

明

賜南京錦衣衛正千戶蔡紹伯敕

朕登九五之尊叨獲羣賢汗血誅除豪傑恢復中華勳  
猷顯赫宜擢寵階今武德將軍義兵千戶蔡紹伯者博  
習詩書無負聯魁後裔貫通翰畧志述世祖垂謨賑災  
恤饑愛養親族草寇蠹擁仗義興師解東巖圍戰郡城

官平縣志 卷之十三  
賊一方捍衛得協力以全民萬里行師能致身以報主  
朝朕婺州提兵獻策浙括歸順閩海來朝攻偽漢平吳  
越勞臣遠截征勝非一朕得天下卽位金陵賴臣奮力  
堅持濟事茲特封爾爲開國輔運推誠宣力武節將軍  
驍騎尉南京錦衣衛正千戶之職誕受厥命功加於時  
德垂後裔嗚呼圖事揆策幃幄屢見奇勛崇德報功旂  
常永綏大烈與國同休敬承懋賞欽哉

賜河南汝寧府光州知州梁道高敕

洪武二十八年

朕聞昔之君天下者設官分職以贊治功雖秩有大小  
自下而上自上而下以考賞罰焉專符爲信情意交孚

所以誠之至也朕倣古制授爾以官給爾以符往盡爾  
心恪勤乃事給由來勤朕將合焉以考爾績其敬之哉

賜順天府通州知州戴子葵敕

永樂元年

朕惟聖人之孝愛其所親繼志推恩朕所當務爾以才  
器事朕皇考太祖皇帝建文之際黜爾爲民朕卽位之  
初思皇考所任之人召致錄用爾旣來朝而筋力衰邁  
弗欲重勞以事特賜冠帶宴賞仍以舊職致政歸榮鄉  
里遂其優游撫爾子孫勸鄉民子弟爲善爾其欽哉

封主簿吳則敕

宏治九年

教子以忠必使之効勞於國勸臣以孝必爲之致寵於

親業有能光於前恩必務從於厚爾直隸松江府華亭縣主簿吳則乃禮科給事中吳仕偉之父儒業發身查封佐政義方之訓已兆於賢科家慶之榮未終於祿養爰因考最特示追崇是用贈爾爲徵仕郎禮科給事中庶冥漠之有知服恩光之無斁

贈孺人鄭氏敕

家以嚴稱母德實均於父慶由善積天道豈遠於人爾鄭氏乃禮科給事中吳仕偉之嫡母從夫順正教子勤勞顧茲最績之書實爾有成之力養雖不逮恩則宜推茲特贈爲孺人冥漠有聞服斯寵命

封禮科給事中吳仕偉敕

朕六科建署七品分官各應部曹實預盈廷之議職端彈駁亦均治事之勞國體是關公論攸託茲惟清要之地宜居直諒之人禮科給事中吳仕偉登名甲第列職諫垣闕廷輸獻納之忱部署嚴叅駁之體才優於閱歷志慎於操修考最旣書茂恩宜布今特晉爾階徵仕郎錫之敕命於戲論事者必先其大尙存爲國之心持身者必謹其終勿替官守之節益臻後效用逮登庸欽哉

贈孺人梁氏敕

夫婦之際風化所先君臣之間恩禮所在凡爲伉儷必

與褒封禮科給事中吳仕偉妻梁氏揚芬令族媿美儒門職能供饋祀之勤居不廢詩書之訓乃因夫貴昭示國恩茲特封爲孺人益敦祇慎之風用迓嘉祥之至

賜文林郎太常寺博士潘湘敕

正德六年

太常之職於列寺爲清班博士之員在羣僚爲高選必才行之兼茂斯名績爲有成匪慎簡求孰堪委畀爾太常寺博士潘湘天賦英資人稱遠器登明甲第擢任今官勤慎在公心實虔于邦祀清嚴律已志克守平官箴賢勞既邁乎常倫褒寵適逢乎慶賚名非倖致恩豈徒施茲特進爾階文林郎錫之敕命於戲禮莫大於祀尙殫對越之誠官必考其成嗣有超遷之寵益臻來效光我命詞欽哉

贈孺人鄭氏敕

正德六年

人臣有勞於國朝廷必寵其家肆惟伉儷之良亦被褒封之命典章具在存歿攸同太常寺博士潘湘妻鄭氏淑慎有常柔嘉維則出自仁賢之族克守家規嬪於科第之英式全婦道鷄鳴儆戒方賴其相成象服光華竟違於偕老宜頌卹典以賁幽局茲特贈爲孺人庶懿靈之有知服休光於無斃

贈文林郎太常寺博士潘玻敕

正德六年

旌獎賢勞乃朝廷之著典表章先德亦人子之至情蓋忠本孝移而親由子顯式關倫理奚間存亡爾潘玻乃太常寺博士湘之父山澤遺才鄉邦善士安恬有守簡靜無華篤好詩書心不忘於世用敦行孝友動必謹於家規顧惟令子之登庸實出義方之貽訓養違三釜不勝風木之悲光賁九原宜示絲綸之命用彰潛德永慰孝思茲特贈爲文林郎太常寺博士庶其未泯之靈歆此至優之渥

贈孺人陳氏敕 正德六年

母德兼乎教育與父實均君寵重於褒封惟臣是勸眷

此賢能之績足徵慈範之良恩典所加幽明罔間爾陳氏乃太常寺博士潘湘之母慈惠夙成儉勤兼至相夫有道治內無違孝事尊章躬備旨甘之奉義周貧乏每多恩惠之施顧義方克佐乎良人肆令子早登於朝署栝捲之澤未泯風木之感彌深爰體孝思用伸追卹茲特贈爲孺人尙歆服於寵光益延休於家範

賜江西撫州府宜黃縣知縣俞世美敕 隆慶二年

天下朝覲官員朕荷皇天眷命續承鴻業託於億兆之上深惟輯區甯宇以答天心卽位之初已函下詔蠲征免役蕩滌煩苛有不便於民者悉與更始猶欲得循理

之吏平心畢力各務究宣恩澤以登於至治顧在位者多因循之弊鮮任職之心口習空言而不求其實政尙苟且而惟便於私欲民之安於田里而無愁怨歎苦之聲不可得也朕甚憫之茲當來朝特命所司審覈黜其不職甚者爾等獲被簡留蓋寬之也自今其幡然永思善道勵精自新務在廉以律已仁以撫民公以存心勤以涖事率是四者而行之自然政平訟理民咸樂業治可庶幾於古矣朕豈無爵祿以爲勸乎假使狃於舊習或朘削民財以自豐或殘害不辜以爲快或以已私拂公理或以宴安廢官事有一於此皆足以蠹政傷民是從事不恪而守官無狀也朝廷之上凜然憲典在焉爾等曾不懷怵惕而戒勉譬猶踐薄冰以待白日也豈不謬哉尙相與欽承之毋替朕命敕

馳封徵仕郎俞存友敕 萬歷十三年

人臣忠於其職志在顯揚故國家錫命酬勞緣子逮父豈非體孝勸忠之道哉爾俞存友乃山東青州左衛經歷司經歷俞欵之父潛修不試式穀而昌考參幕之才知過庭之訓是用贈爾爲徵仕郎青州左衛經歷司經歷養違三釜恩耀九原

馳封孺人徐氏敕 萬歷十三年

人有恒言不知其母視其子是故母與子貴彝典具存  
爾徐氏乃山東青州左衛經歷司經歷俞欵之母順而  
守正愛且知勞勗乃嗣賢一官効績是用贈爾爲孺人  
格棬慰慕窀穸蒙輝

賜徵仕郎俞欵敕

萬歷十三年

淄青海岱間一都會也置衛衛之而選用儒流司其案  
牘此亦文武相資之義也爾山東青州左衛經歷司經  
歷俞欵毓才鬻序充賦大廷仕佐邑符掄參戎幕敏明  
集事廉恪持躬茲以歲滿授爾階徵仕郎錫之勅命夫  
士才貴通方安得諉於軍旅未學爾尙懋修以祇厥敘  
陟明有典朕不爾遺焉

贈孺人祝氏敕

萬歷十三年

人臣修職抱功而朝廷錫之恩命必偕其室家所以重  
倫理酬敬助也爾山東青州左衛經歷司經歷俞欵妻  
祝氏恪遵內則宜于家人匡弼乃夫效勞武幕是用封  
爾孺人勿忘儆戒祗迓休光

國朝

馳封修職郎梁尙璧敕

康熙六十一年

任使需才稱職誌在官之美馳驅奏效報功膺錫類之  
仁爾梁尙璧乃浙江金華府湯溪儒學教諭梁祚璿之

父雅尚素風長迎善氣弓冶克勤於庭訓箕裘丕裕夫  
家聲茲以覃恩馳贈爾為修職郎浙江金華府湯溪縣  
儒學教諭錫之救命於戲肇顯揚之盛事國典非私酬  
燕翼之深情臣心彌勵欽哉

馳封孺人王氏敕

康熙六十一年

奉職無愆懋著勤勞之績致身有自宜酬鞠育之恩爾  
浙江金華府湯溪縣儒學教諭梁祚璿之母王氏淑範  
宜家令儀昌後早相夫而教子俾移孝以作忠茲以覃  
恩馳贈爾八品孺人於戲賁象服之端嚴誕膺鉅典錫  
龍章之渙汗永播徽音欽哉

馳封登仕郎陳奕珩敕

雍正十三年

設官分職昭器使之無遺錫類施仁喜蒙恩於伊始爾  
陳奕珩乃浙江紹興府訓導陳雲翥之父秉心醇樸飭  
行端方教誨懷式穀之勤政事本詒謀之善茲以覃恩  
馳贈爾為登仕郎浙江紹興府訓導錫之救命於戲一  
命得以逮親遂膺曠典庶政期於稱職永荷榮光

馳封孺人徐氏敕

雍正十三年

登皇路以馳驅忠原本孝入庭幃而侍奉嚴必兼慈爾  
浙江紹興府訓導陳雲翥之母徐氏性本和柔飭衿聳  
於閭內教惟勤慎紆章服於庭前茲以覃恩馳贈爾為



九品孺人於戲所親邀優渥之恩勉圖懋績有子效靖  
共之誼永表芳型

馳封修職佐郎鄭世芳敕 乾隆十六年

任使需才稱職志在官之美馳驅奏效報功膺錫類之  
仁爾鄭世芳乃浙江嘉興府訓導鄭瑞鳳之父雅尚素  
風長迎善氣弓冶克勤於庭訓箕裘丕裕夫家聲茲以  
覃恩馳贈爾爲修職佐郎浙江嘉興府訓導錫之敕命  
於戲肇顯揚之盛事國典非私酬燕翼之深情臣心彌  
勵

馳封孺人潘氏敕 乾隆十六年

劬勤奏績膺寵命於朝廷渙汗敷恩闡幽光於母氏爾  
浙江嘉興府訓導鄭瑞鳳之前母潘氏懿儀不忒慈範  
彌昭諧早歲之倡隨啟後人之昌大茲以覃恩馳贈爾  
爲八品孺人於戲播芳型於彤管有命自天賁嘉寵於  
黃壚永綏厥祚

馳封孺人祝氏敕 乾隆十六年

奉職無愆懋著勤勞之績致身有自宜酬鞠育之恩爾  
浙江嘉興府訓導鄭瑞鳳之母祝氏淑範宜家令儀昌  
後早相夫而教子俾移孝以作忠茲以覃恩馳贈爾爲  
八品孺人於戲賁象服之端嚴誕膺鉅典錫龍章之渙

汗永播徽音

勲封儒林郎王泰來敕

乾隆四十三年冬

考績報循良之最用獎臣勞推恩溯積累之遺載揚祖澤爾王泰來乃捐職州同王萬齡之祖父錫光有慶樹德務滋嗣清白之芳聲澤留再世衍弓裘之令緒祐篤一堂茲以爾孫遵例急公勲贈爾爲儒林郎錫之敕命於戲聿修念祖膺茂典而益勵新猷有穀貽孫發幽光而不彰潛德

勲封安人陶氏敕

冊府酬庸聿著人臣之懋績德門輯慶式昭大母之芳勳勲奏績膺寵命於朝廷渙汗敷恩闡幽光於母氏爾浙江嘉興府訓導鄭瑞鳳之前母潘氏懿儀不忒慈範彌昭諧早歲之倡隨啟後人之昌大茲以覃恩勲贈爾爲八品孺人於戲播芳型於彤管有命自天賁嘉寵於黃壚永綏厥祚

勲封孺人祝氏敕

乾隆十六年

奉職無愆懋著勤勞之績致身有自宜酬鞠育之恩爾浙江嘉興府訓導鄭瑞鳳之母祝氏淑範宜家令儀昌後早相夫而教子俾移孝以作忠茲以覃恩勲贈爾爲八品孺人於戲賁象服之端嚴誕膺鉅典錫龍章之渙

汗永播徽音

勲封儒林郎王泰來敕

乾隆四十三年冬

考績報循良之最用獎臣勞推恩溯積累之遺載揚祖澤爾王泰來乃捐職州同王萬齡之祖父錫光有慶樹德務滋嗣清白之芳聲澤留再世衍弓裘之令緒祐篤一堂茲以爾孫遵例急公勲贈爾為儒林郎錫之敕命於戲聿修念祖膺茂典而益勵新猷有穀貽孫發幽光而不丕彰潛德

勲封安人陶氏敕

冊府酬庸聿著人臣之懋績德門輯慶式昭大母之芳

徽爾陶氏乃捐職州同王萬齡之祖母箴誠揚芬珩璜表德職勤內助宜家久著其賢聲澤裕後昆錫類式承乎嘉命茲爾孫遵例急公勲贈爾安人於戲播徽音於彤管壺範彌光膺異數於紫泥天庥永劭

勲封安人

祝氏敕

嘉績聿隆於報最奕世蒙庥慈徽載著於勲封重闡襲慶爾祝氏乃捐職州同王萬齡之繼祖母珩璜傳芳蘋蘩濟美溯詒謀於闡則繼美益彰宏錫類於朝章推恩並厚茲爾孫遵例急公勲贈爾為安人於戲鸞書賁彩普昭一體之榮施馬鬣揚休永表重泉之遺澤

勲封儒林郎王庠敕

乾隆四十三年

資父事君臣子篤匪躬之誼作忠以孝國家宏錫類之恩爾王庠乃捐職州同王萬齡之父善積於身祥開厥後教子著義方之訓傳家裕堂構之遺茲以爾子遵例急公封爾爲儒林郎錫之勅命於戲殊榮必逮於所親寵命用光夫有子尙宏佑啟益勵忱恂

勲封安人祝氏敕

奉職在公嘉教勞之有自推恩將母宜錫典之攸隆爾祝氏乃捐職州同王萬齡之母壺範宜家夙協承筐之熾母儀詒穀載昭畫荻之芳茲以爾子遵例急公封爾爲安人於戲彰淑德於不瑕式榮象服膺寵命之有赫益賁徽音

勲封修職佐郎梁萬春敕

乾隆五十年

任使需才稱職誌在官之美馳驅奏效報功膺錫類之仁爾梁萬春乃浙江嚴州府桐廬縣訓導梁喬之父雅尙素風長迎善氣弓冶克勤於庭訓箕裘丕裕夫家聲茲以覃恩勲贈爾爲修職佐郎錫之敕命於戲肇顯揚之盛事國典非私酬燕翼之深情臣心彌勵

勲封孺人葉氏敕

乾隆五十年

奉職無愆懋著勤勞之績致身有自宜酬鞠育之恩爾

葉氏乃浙江嚴州府桐廬縣訓導梁喬之母淑範宜家  
令儀昌後早相夫而教子俾移孝以作忠茲以覃恩馳  
贈爾爲八品孺人於戲賁象服之端嚴誕膺鉅典錫龍  
章之渙汗永播徽音

馳封孺人劉氏敕

乾隆五十年

佐庶司之經理爰獎通才勸百爾之孝思用章慈教爾  
劉氏乃浙江嚴州府桐廬縣訓導梁喬之繼母德可型  
家恩能育子顧復無殊於所出榮光適逮於乃身茲以  
覃恩馳贈爾爲八品孺人於戲師賢母之風勵茲清白  
沛熙朝之命垂此徽音

馳封修職佐郎潘士業敕


道光八年

任使需才稱職志在官之美馳驅奏效報功膺錫類之  
仁爾潘士業廼浙江湖州府長興縣訓導潘德行之父  
雅尙素風長迎善氣弓冶克勤於庭訓箕裘不裕夫家  
聲茲以覃恩馳贈爾爲修職佐郎浙江湖州府長興縣  
訓導錫之敕命於戲肇顯揚之盛事國典非私酬燕翼  
之深情臣心彌勵

馳封孺人鄭氏敕

奉職無愆懋著勤勞之績致身有自宜酬鞠育之恩爾  
浙江湖州府長興縣訓導潘德行之母鄭氏淑範宜家

令儀昌後早相夫而教子俾移孝以作忠茲以覃恩賜  
 贈爾為八品孺人於戲賁象服之端嚴誕膺鉅典錫龍  
 章之渙汗允播徽音



表

唐

葉法善乞歸表

崇道之門大興元範臣得沐皇化服事五朝竭忠盡誠  
 披瀝肝膽一有所補萬死無恨况屬聖朝重張府縣并  
 安品物凡在含識咸用昭蘇陛下不棄芻蕘復收簪履  
 臣愚陋過蒙恩渥假具列棘之司加以茅苴之封褒榮  
 權被澤滿泉扃然臣胡顏堪此大造灰身刎首不能上  
 答前歲天恩賜歸鄉里殘魂假息獲拜先塋聚族聯黨  
 不勝悲慶親姊暮年百餘三歲見臣還邱壑載喜載悲

纔逾一旬奄忽先逝雖死生有命理則同然而骨月有情豈無哀痛積年之疾一朝遂發形容枯劣殆不能勝往者虔奉綸言俾投龍璧奉使之役理應復命心馳魏闕意欲駿奔病在江鄉力難勝至自前年之冬末驟辭南土去歲之夏首纔達東京死魂餘步抑難前進甯有形枯心疾叨廁朝班紫綬金章人臣極貴自非功高帶礪不可錫其寵光况道本希夷無藉觀聽謬膺匪報實玷國恩伏願陛下特賜餘魂得歸邱墓則物喜遂性天覆無涯方違闕庭不勝扳戀

批答省表具知師羽儀碧落梁棟元門迹雖繫於人間神自超於物累方欲授三清之要宣六炁之和資於朕躬助以爲政且光慶之儀衆妙所存江海之心此期難允卽宜斷表深體朕懷

葉法善乞歸修祖塋表

二月二十一日扶病陳誠特乞餘魂歸修塋墓而高天未聽跼地無所因此白氣發動殘生如線未辭聖代奄成異物幸賴天覆含育未卽泉壤貸及餘命得遂微心臣前奉綸言賜歸桑梓旣賫龍璧備歷山川夙夜周章恭承國命比及鄉里時迫嚴寒屬數年失稔百姓逃散親族餒饑未辨情理欲樹碑碣私願莫從而碑石猶在

蘇州未能得送鄉里臣焦心泣血以日爲歲若生心不遂死不瞑目伏惟陛下覆幬亭毒昆蟲遂性孝理之教被及含生臣皮骨空存命均風燭乞餘喘未絕所願獲伸一聞聖恩九泉無恨方當辭違宸極昇疾江湖伏枕疏襟不勝悲戀

批答省表具知師體含衆妙道冠羣仙希微所以得真清淨由其助化然因心之懇扶病思歸表疏累聞情詞轉至今依所請有軫於懷

葉法善乞貶封父表

臣聞孝道之大人行最先故洪覆無言神女有卷綃之應厚載至廣江鱗表充膳之徵斯實感於神祇通於天地者也伏惟陛下孝道侔天地聖德符神祇齊郡耀靈芝陵寢降甘露休徵之應皆聖孝之符念臣身無橫草之功虛受茅苴之錫九卿之任下被江海五等之爵上應星躔臣崦嵫日迫泉壤將歸生我父母旣未答於劬勞覆我皇恩實有重於山岳臣誠微物豈得無心自忝辱朝列日夜惶懼生無益於聖代死實負於康時而犬馬私情切有所願乞以陛下所授臣爵回贈先父上不違陛下教孝之風下得展臣罔極之念一遂哀衷萬死亦幸且臣雞皮鶴髮形骸若是殘魂假氣奄忽無時去



宣平縣志 卷之十三 三  
冬辭違闕廷興疾道路曲蒙陛下覆養之德復喜生全  
今得重謁紫宸趨躡丹地及茲餘喘披瀝微誠陛下所  
假臣厚祿多錢乞納天庫官名封號以被泉門則聚族  
糜軀合宗嚥膽存亡幸甚所不敢言伏願天慈沛然聽  
許再生非重百身莫贖

批答省表具知師名登仙境才軼道樞保護朕躬不忘  
厥德朝之爵秩事叶至公覽所具陳情深大孝朕敦風  
厲俗益所優嘉師崇讓鳴謙固難依允所請贈者別有  
處分

唐

葉法善傳

新唐書

道士葉法善柘州栢蒼縣人自曾祖三代爲道士皆有  
攝養占卜之術法善少傳符籙尤能馱劾鬼神顯慶中  
高宗聞其名徵詣京師將加爵位固辭不受求爲道士  
因畱在內道場供待甚厚時高宗令廣徵諸方道術之  
士合鍊黃白法善上言金丹難就徒費財物有虧政理  
請覈其真僞帝然其言因合法善試之由是乃出九十  
餘人因一切罷之法善又嘗於東都凌空觀設壇醮祭  
城中士女競往觀之俄頃數十人自投火中觀者大驚

救之而免法善曰此皆魅病爲吾法所攝耳問之果然法善悉爲禁効其病乃愈法善自高宗則天中宗歷五十年常往來名山數召入禁中盡禮聞道然排擠佛法議者或譏其向背以其術高終莫之測睿宗卽位稱法善有冥助之力先天二年拜鴻臚卿封越國公仍依舊爲道士止於京師之景龍觀又贈其父爲歙州刺史當時尊寵莫與爲比法善生於隋大業之丙子死於開元之庚申凡一百七歲八年卒詔曰故道士鴻臚卿員外置越國公葉法善天真精密妙理元暢包括秘要發揮靈符固以冥默難源希夷罕測而情栖蓬閭跡混朝班保黃冠而不拔加紫綬而非榮卓爾孤秀冷然獨往勝氣絕俗貞風無塵金骨外聳珠光內應斯乃體應中仙名昇上德朕當聽政之暇屢詢至道公以理國之法數奏昌言謀叅隱諷事宜宏益歎徽音之未泯悲形解之俄留曾莫憇遺殲良奄及永惟平昔感愴於懷宜申禮命式旌泉壤可贈越州都督

舊志葉真人傳

真人名法善字道元一字太素葉公沈諸梁之後本南陽人漢末桓靈時避地江左鼻祖儉字靜能遍搜佳山水得會稽之南鄉卯山隱焉高祖乾昱曾祖道興祖國

重父慧明

詳李邕碑

四世習隱累辟不就間氣所鍾適開道脈母劉因晝寢夢流星入口吞之既而娠經十有五月歲在困敦月黃鐘而真人生異香入室神光滿堂祥雲繚繞元鶴升降初真人在孕聲聞於外及生聰慧岐嶷甫七歲風度粹雅古貌老成父熟視之曰汝幼勤苦老必清貴涉江而游三年不返還問其故曰三青童引我飲以雲漿留連許時十歲有善人論者曰子日角月淵隆準僂皆修上促下當爲帝王師及冠身長七尺額現二午性純潔不苟葦潛居好古十一誦詩書十二習禮樂耽周易嗜老莊河洛圖緯悉詳覽焉隨父棲遯卯山

樵蘇自給登高臨深占星候氣彼時已具役使之術門有巨石當路呪叱起之須臾移疊於山東南今卯山石坎猶存嘗訪隱得靈虛福地中有白馬山有石室林泉環滙移家寓焉家貧親老力耕逮養日夕不休常有紫雲覆之同耦奪其處雲亦隨焉無何遭父母喪於歐溪近山下墓地有白鹿卧雪中跡之躡去其處溫然有白氣綿亘上下真人異之環視重岡複嶂延袤起伏形勢備具喜曰此可藏矣遂卒塋事年十三從栝蒼入天台金華歷四明會稽渡江北涉天柱天目洞庭句曲衡霍諸嶽南游劍水登赤城尋羅浮勝蹟詣豫章萬法師求

辟穀導引胎息煉丹之訣年十五中毒幾殆天台茅君  
飛印救免

詳御製碑

於青城趙元陽受遁甲步元之術於嵩

高韋善俊傳入史雲躋之道入蒙山路遇羽士問曰子  
何往答曰求師學道羽士曰予亦訪道幸遇於此我欲  
暫他往有小衣幘君爲守之經數日羽士來曰子誠長  
者願以書劍相報遂開幘取贈十月上浣夜半焚香矢  
愿忽聞空中鳴鐘擊磬簫鼓管籥聲起視之騎從滿堂  
有神人各長八尺餘厥狀殊常衣雲錦衣簪通天冠真  
人伏地虔請神人口汝毋恐太上遣吾諭汝汝合得道  
昔乃太極紫微左宮仙翁領校簿書錄諸仙及得道士

姓名增減年算一月三奏緣汝失謹曾於休暇日遊乎  
八荒因茲謫世修功累德行滿日當復汝仙班今汝當  
行三五盟威正一之法誅斬魑魅妖魔救護羣品惠施  
貧乏代天行化但以陰騭爲先不須別有貢告齋三日  
受吾口訣不必文字相付輕泄帝旨罪延七祖卽以符  
印劍授之又一神人曰卿今退真下生人世宜廣建功  
德惟是三洞上清上法上真須精進修習勿替并長存  
五千文統理人道明察天地道當自成更授五嶽圖符  
天皇大字及二一黃庭紫書八景素書步躡罡紀又一  
神人曰至道微妙口不能言要當守一屏去驕淫每日

鳴鐘擊鼓調理三關納吐外內神丹指存日月開閉門  
戶期修太上自然朱光潛照黑英白元自來功成行滿  
必當昇舉後期於許氏旌陽宅北山峰相見真人伏地  
謝曰某行微能薄未悟天真枉垂雲駕非意所及恭聆  
教旨精意舉行由是潛行陰德濟度死生至揚州劍開  
長史夫人之腹取病示人凡刲腸滌胃扶目洗睛一無  
損壞全不痛楚人強與錢則施諸貧病其邪魔淫祀爲  
災害者行履所及並皆殄滅名聞遠近徵召再三苦辭  
不行強赴闕廷高宗不使備臣禮湛然寂然一無所言  
但喘息而已上曰卿病邪對曰臣病在朝市療在山林

願從退隱上曰此逸人耳昇以上卿辭不拜曰臣願出  
家請爲道士帝從之度於景龍觀多留內庭詢以道法  
吉凶臧否悉預知之黑闥作亂上憂惶無計真人曰小  
寇不足慮尋遣符敕天兵漫空而來擊賊奔走上曰捍  
衛社稷師之力也屢加寵錫悉辭不受曰此天功也臣  
何與焉中書侍郎女狐爲祟顛狂歌哭每見一僧乘青  
驢來病遂作奉敕治之真人欲示神變謂侍郎曰某辟  
穀日久疲羸無力希一飽餐當卽聽治侍郎急具蔬食  
真人一飯二斛麵三碩瓜菜果實無算見者驚詫尙云  
未飽頃僧乘驢至瞰視真人卽却走真人叱咒吏兵擒

之女遙知發聲大哭真人大叱一聲僧變爲狐驢乃化  
狗鞫之曰家城南大墓中往掘視得狐百許金銀羅綺  
浪籍其內有素書三卷野狐名目宗譜官位名諱書符  
焚之狐悉滅上及皇后諸王公主親受道法百官子弟  
及諸道流授經者前後計數千人施贈填委通衢隨其  
所得悉助觀宇并及窮乏時有供奉周正諫每使冥官  
上天曹檢事須臾間來報善惡未嘗失期帝令密厭之  
及問正諫都無所知數日冥使不至上令師解之正諫  
云被葉師遣向天門把捉不得通上又密令鑿地爲坎  
樂人入坎鼓樂謂師曰地無故有聲請禳之真人書符

四釘之聲便絕上責樂人報云四方有蛇各如柱大張  
口向人作噬狀懼不敢動一日請上暫離寢避災方移  
訖風雨大作霹靂當寢處直下甲帳皆焚上驚悸不已  
真人雖出入形幃而韜形匿跡和光同塵心存大道志  
在騰舉於是辭還栝蒼煉丹採藥往來於卯酉山中忽  
五月一日有叟詣門號泣求救詢之答曰某東海龍也  
上帝敕主入海之寶千年一更其任無過失者超登某  
已歷九百七十年矣微勲將就有婆羅門者施逞幻術  
於海畔禁咒積二十年其術將驗海水如雲捲上天際  
是月五日海將就涸統天鎮海之寶必爲幻僧取其今

哀求法救真人許之五日午時敕丹符飛鎮海水復故  
胡僧愧歎赴海死叟輦奇珍以報辭不取因曰此山峰  
去水遠但得一勺泉此爲惠也是夕風雨加厲及明館  
側清泉一派自石渠迸出今謂之天師渠經旱不竭見松  
陽志時值溽暑與道衆遊清溪忽沉水中七日不返同遊  
歸告徒衆傍溪覓之後於舊處復出曰我共河伯遊蓬  
萊值羣仙宴集留俄頃間慮汝等憂故亟反今果然也  
遂入天台尋司馬鍊師訪不死之福庭去桐柏入靈墟  
謂鍊師曰蔭落落之長松藉萋萋之織草今恍然也共  
登華頂望海曰蓬萊去此不遠與子當復應歸彼爾時

鍊師負琴真人伏劍過石橋臨清溪萬仞搏壁立之翠  
屏復何喘焉歲辛丑則天后徵真人投龍採藥遍禱名  
山大川雲軒招搖驪騶騷駘甚盛舉也中宗時武三思  
秉國柄信讒諛真人屢諫忤旨貶嶺外門人色憂真人  
曰否泰有時隱見正當爾也遁至南嶽抵連州去廣州  
尚數百里陸地不通須舟濟先遣門人乘舟至廣義唐  
觀道衆馳報都督胡元禮官僚士庶江畔候迎少頃見  
真人乘白馬從水上來遂引至龍興觀憩焉受道術施  
園林田宅者甚衆一無所取並給長住隨得旨移洪州  
依宗華觀偕弟子入西山洪崖所棲隱處流連三載修

上清隱法景龍四年歲辛卯

編年作二年。查景龍年號只丁未戊申己酉三年

無辛卯

九日日中慶雲廣樂異香馥郁浮空而來漸至室

內一神人曰君累功將滿宜自精進道高魔試須當慎之太上令我豫賈變形易骨金精上藥與卿時運未到未可卽餌密而藏之又曰今十月當入佐當今皇帝及嗣子皇帝傳授道法兼殄元兇天步艱難龍飛在卽卿當輔毗社稷安鎮名山嶽瀆投龍醮祭凡在於子司天佑之且受世榮爵至封邑歲鶉尾月鶉火三日日中時西嶽侍郎復卿太極紫微左宮之班真人再拜謝至十月果奉敕宣道士葉某入京至則留內侍初元宗在藩

卽時與真人處隨至潞州預知韋氏之變凡謀逆之黨並豫疏之又密奏云昔遇神人常言有開元帝號及上卽位先天二年卽改元開元真人在帝左右獻可替否潛謀秘贊驅害懲兇元功遐被相國姚崇女死投符起之張尉妻死而化生復爲夫婦真人曰此屍媾之妖不速去張尉必死投符化爲黑氣錢塘巨蠱淪溺舟航清沙鎮長沈愈躬迎真人候潮至投丹篆符鎮之劍勒道靜二字於巖上各方三丈許蹟尙存卽三教山也上移仗上陽宮觀燈結構綵樓三十餘間飾以金玉翡翠高百餘丈微風動觸鏘然成韻燈爲龍螭騰躍狀似非人



力所辦上促召真人樓下觀之奏曰彩燈之盛固無比矣然涼州今夕之燈亦亞於此但奢靡過甚無益於國上恠其言欲驗其術曰今一往觀得乎曰此易易耳以至尊遠涉恐非所宜上力强之遂請上瞑目騰袂而上俄忽至以所隨如意貫酒及旋復請瞑目頃至樓下歌舞未終繼遣中使托故使涼因取如意以還八月既望與上遊月宮聆天樂問其曲曰紫雲上素知音律記其拍遂著樂府曰霓裳羽衣自月宮還過潞州俯視城郭悄然月色如晝請帝以玉笛奏曲時笛尚在寢中敕神取之頃刻至既奏曲投金錢城中而還旬日潞州奏八

月望夜天樂臨城并獲金錢以進一日上問張果何人也對曰臣知之然言之即死若陛下能免冠徒跣救臣臣方敢言上許之乃曰混沌初分白蝙蝠精言未絕七竅流血僵仆於地上免冠跣足詣果所請罪果徐曰此兒多口過不罰之恐洩天機耳上復哀懇果以水噴其面遂復吐蕃使進寶函封奏曰請皇帝自開毋令他人知機密舉朝默然真人曰此是凶物宜令蕃使自開及開函弩發中蕃使死上驚歎愈加禮焉開元二年八月加授金紫光祿大夫鴻臚卿越國公三讓不受上不許制畧曰德包真素學究元微豫覩釁萌咸申忠款宜加

寵命以答茂功仍遂乃懷俾從真服真人辭不獲免請  
馳贈先人并捨栝蒼山故居改置宣陽觀即冲真凡道

場供給珍奇寶物悉屬內賜敕贈真人父慧明銀青光

祿大夫使持節歙州刺史真人又請卯山西南祖宅為

觀賜額淳利在松舊市後改永甯并請還山拜墓封樹建碑初真

人祖塋松陽西山山有石雞能鳴遂置道院今天真觀立碑

其下請太守李邕撰文并求書不允夜追其魂書之未

竟鐘鳴至丁字下數點而止鏡畢持墨往謝邕驚曰始

以為夢乃真邪初得碑石於海嶠遣神人運歸水神不

知誤裂其石隨投符治之神哀求獲免乃以膠綴石斷

處真人父神道碑在宣慈鄉文亦邕撰國子監生韓擇

木八分書開元五年歲丁巳三月真人別鄉人曰別易

會難此去恐不相見左右盡歛戲車騎駢闐士女繹絡

送之登途曰吾來年即遣信還可於此伺之信到吾不

久矣明年正月二十七日忽元鶴數百自北而東翔集

歐溪三日五色雲上覆之八年庚申五月真人年已百

有七宜作五查葉法善生隋大業丙子至唐開元庚申

矣於西京景龍觀托疾潛服神丹天真畢至雲輦排空

晝夜不絕弟子尹愔盧齊物等秘而不言至六月三日

甲申日午真人化劍為尸而去西京人但見院中有青

宜平縣志 卷之二十三  
煙直上與天相接竟夕不滅座側留詩三首一曰昔在  
禹餘天還依太上家參以掌仙籙去來乘煙霞暫下名  
利城渺然思金華自此非久住雲上登香車二曰適向  
人間世時復濟蒼生度人初行滿輔國亦功成但念清  
虛樂惟忻下界榮門人好住此翛然雲上征三曰退仙  
辭此地去俗人爲榮今日登雲路歸真游上清泥丸空  
示世騰舉不求名爲報學仙者知余朝玉京又遺書弟  
子仲容云將吾書及詩進上不得求官當奉詔監喪歸  
壘栝蒼吾去後百六十年外卯山當出一人更過於吾  
若有人於吾舊居修行卽其人也真人曾藏劍丹於卯

山巨石下後艷去奢得之仙去

詳松陽志

真人上昇後弟子

收得詩書上呈上感泣親臨喪所輟朝三日王公以下  
無不悲慟翼日追贈越州都督十六日敕內閣圖像御  
製贊曰詞江瀉浪藝苑含芬別有真氣青山出雲卓爾  
無對超然出羣幽人薊子道士封君太子復贊曰昂昂  
高士瀟灑孤峙致雨排雲乘霓控鯉果而不伐爲而不  
恃御風冷然爲物終始有制書具賀知章元虛誌序中仍敕度真人姪  
司馬仲容爲東京聖真觀道士與中使護喪歸壘宣慈  
觀側王公以下出青門奠送傾城縞素攀號未至楊州  
冥應先至有白鶴數百翔於栝蒼墓上雲覆其頂旬日

靈輻至奉敕衢婺處三州助塋百鳥哀鳴天爲改色帝  
緬想仙風眷眷不已敕於觀立碑寵以宸翰命太子題  
額一年後棺忽自開惟見冠裳劍履始知真人實昇舉  
耳迨宋政和六年道士吳慧淳得簪履劍器於土中詣  
闕以聞乞加號諡給度牒上從之追贈致虛見素法師  
給度牒三十歲度一人宣和二年加號靈虛見素真人  
宋

菊平子梁伯大傳

坦東 戴德琳

泰來字伯大初名夢予處麗水懿德鄉人其先五世祖  
字惠宋承務郎長子嗣立次安世登紹興甲戌進士乙  
科移官以司農出守韶州除廣南西路漕運使兼鹽使  
泰來乃嗣立元孫安世從孫也幼穎悟有志節胚胎前  
光龔家學綽有從祖風其叔祖濟娶戴惟一女以兄溥  
之次孫夢予後濟也更名泰來昭穆得其序慈孝盡其  
道比壯三十有六歲嘗咸淳九年以舉子業鄉貢明年  
殿試少帝諒陰類試王龍澤等比庭試出身亦乙科再  
易進士亦甲戌歲也補迪功郎差充台州邑之寧海尉  
待闕元兵南下遭宋鼎移志與願違也世居鄉曰龜山  
於養祖母戴所居周坦相距伊邇梁之族屬亦有居此  
者與諸戴遊以詩文爲已任樂育英才學者慕之因居

於是卽其景顏曰延綠堂其志慕唐相裴度隱居綠野別墅之勝與詩人觴咏自娛又取柳子厚新綠堂記中邇延野綠遠混天碧之語又書王安石詩一水護田將綠遶一聯於座隅心與景會常自記焉自元以來不求薦不應辟誓不屑爲也妻吳氏姑蘇人志亦若是植菊于庭取陶潛以自况平生奇崛之氣放之於平故自號菊平子著詩以見志曰菊平小藁濂溪周先生嘗曰噫菊之愛陶後鮮有聞夫千百載同心同好者僅泰來耳嗚呼丈夫以心許國不忍負於君親故行藏安於所遇若夫弄筆墨徼利達澳忍而莫之顧者總總也蓋泰來歛胸中抱負之氣以自平尙靖節之操而不渝雖其才未及展於世而其節足以表於時其志發於歌詠者大可觀於潛世雖異而迹相符固無愧於前修抑亦君子之澤所及也

明

蔡巡檢傳

安慶府  
訓導 彭 博

正統十四年己巳浙處州陶德義聚衆劫掠今安慶望江縣雷港巡檢蔡公儼父宗吉率子姪鄉民屯保里之東巖御史李太守張命儼從都指揮沈出邏累破賊賊懼乘間圍東巖縱火儼兄倫弟休姪晨晏鬪死妻包氏

推賊落巖下恐爲所辱乃抱幼女投巖死母林曰媳婦且死義不受辱我獨生乎亦投巖死宗吉愈奮進擊援不至被執罵不絕口明日遇害僕俞伯亮徐奇富瘞之巖畔一家同日死者三十八人宗族五百餘口儼奮不顧身益以報讎自矢隨總戎陶太監李監丞阮赴郡城儼當前鋒生擒賊首程居五淮與斬首剖心以祭宗吉以雪不共之冤再獲賊首劉四羣賊避去論軍功授儼官辭止領冠帶景泰五年餘黨復起上命僉都御史陳刑部尙書劉督軍委儼隨軍勦捕生擒七功例陞補官吏部累取授職辭欽差鎮守監丞阮尙書孫具儼乞恩

報父狀命下止授儼官天順七年太監盧命儼押課赴內帑詣吏部不准辭授以今官儼泣政有聲請於巡撫狀上不報儼操持益厲府檄委督糧儲先竣前兵部侍郎河南王公遺之忠義貞烈詩溫江何君漢宗工部郎中劉君春學諭王君達莆田許君伯清分教古魏李君僦後先唱詠成卷安慶別駕楊公儼屬筆于余嗚呼承平旣久醜孽薦萌不有忠義以維之貞烈以挽之倫常不幾隳乎余昔居京師儼親故錦衣鎮撫李子伯昂備道其事恨不及識之來皖三載始握手歡若平生復得其政蹟及遺事之詳當吾世而聞儼父母兄弟妻子之

風能不蹶然振起乎儼之先五季時有諱姝者自閩興  
化徙栝龍泉孫抱遷郡通惠門次子咸熙幼子咸謙偕  
居曳山延三四傳戩伯尹仲龍夢龍源浩澄輩相繼科  
第高祖景遷義勇元授義兵千戶策順國朝擒僞漢征  
吳越功封安遠侯子璩襲授武節將軍驍騎尉南京錦  
衣衛正千戶璩子基襲職死于罪子址降授山西藩府  
典伏儼父宗吉孝友以廬墓稱能詩有西湖集藩臬大  
臣以才能薦弗就居常以培植先德鼓勵後人爲心而  
天何以報之乎日報之以子以媳不報之報矣仗義烈  
而死爲天下倡死而不死矣詩云神之聽之終和且平  
儼之後其昌矣

蔡巡檢妻包氏傳

邑諭 徐潤

烈婦包氏前湖廣羅田丞瑜女今冠帶官蔡儼妻也包  
氏爲栝蒼世族生而貞靜甫十歲能諳烈女傳大義諸  
女紅不待姆教而工父母鍾異之及笄擇配得儼蔡故  
聯魁名家旣歸事舅姑相夫子克盡婦道爲里族所稱  
許頃陶德義聚逆流毒村落儼挈家避難東巖賊圍巖  
燒寨劫財貨掠婦女其不得已偷生而從之者蓋數百  
計氏年方二十有五矢不受辱佯告曰我包某之女蔡  
某之妻祖所遺金珠首飾等悉在巖西空穴藏瘞可從

我取去然後相隨未晚賊以爲信令前導至顛崖險不可立處氏仰天泣且歎曰妾命盡此矣卽投崖下以死時正統十四年六月十七日也嗚呼死節人之難能也死節者鮮矣况婦人女子乎今氏以一孱婦人爲丈夫所不能爲之事視彼匿恥含垢滅其天性之真而覷忍以從者亦獨何心哉此其敦薄俗挽頽風而有裨於世教不旣多乎予以其貞烈與奉天竇氏二女相類故特爲之著以俟觀風者之採且以告夫郡邑之賢有司云

國朝

貞烈補遺傳

邑選 梁祚璿

本邑東巖巔昔爲避寇地唐乾符章侯承趣與壻丁鄂等統鄉兵捍黃巢黨裘甫亂宋宣和先世祖宗善與子孚將孚惠親蔡夢奎子昇父子亦統鄉兵捍方臘黨洪載亂明正統鑛賊陳鑑湖等猖獗攻掠城邑蔡宗吉子侄輩亦倣前軌守禦三鄉婦女仍避巖中乃賊狡而勇宗吉一門戰死者三十八人宗族五百餘口各地異姓不可勝紀詎厄運適逢己巳六月十七日巖下攻急巖上失火煙焰漲天隘塞不守賊突而上婦女不肯被汗奮身投崖死者千餘人包氏蔡儼妻儼幸不死殺賊報仇其妻以貞烈傳歌詠成集其不傳者余族梁谷存一



妻兩媳俱死巖下作長短歌一首以誌哀傷余讀而悲  
之因徧搜譜中同死者有朱氏烜婦何氏谷存婦又何  
氏知訓婦徐氏堯婦葉氏埶婦章氏堦婦又朱氏鼎塾  
婦劉氏鼎城婦卽谷存兩媳蕭氏文誌婦共得九人他  
族尙多無考卽此可考者推及無考者彼千餘人皎皎  
清風皆可想見於百世下因特錄之以補貞烈之遺

記

唐

赤石樓隱難記

青田尉楊光干

混茫旣分乾坤成列形下日器積而爲山洎禹別九州  
漢通百越此山則維揚東甌之地峩峩傑出發地千尋  
峭削凌空壁懸四面其乃陰陽偏顧造化有情岬開石  
門路通絕頂天生厚土蔭以森羅地廣百家人勝千衆  
宇宙靈蹟此乃標奇自上元之末袁晁起於天台攻陷  
當州人民逋竄惟此一鄉數百餘家登樓避難飛矢攢  
弧莫能損動相守經旬食殊不繼乃知者以米餒豕投

於巖下羣盜剖之相謂曰巖頂積穀尙多難以待其乏也遂去而攻他疆後便清平干戈不擾無復再遊其樓近代居人皆懼有神棲止及乾符五年趙言奔衝之時不敢登此至中和二年洞寇侵逼焚劫鄉閭軍馬憑陵老幼惶遽倦于奔竄乃有耆父河間郡俞強立志持危邀伴攀緣登此樓頂芟芻荆杞以創草庵巧立層梯以通行路遂召鄉隣老幼共此逃形狂兵攻守無路侵凌是年五月當州中軍屯營州郭屈人投軍者衆仇讎相害村墅邏搜近遠逃亡不可勝數此鄉有武都郡章承趣年當少俊英勇冠時鄉內歸依衆皆推讓蒙兵馬使

僉差部領各藏財帛於諸巖共置軍部於老竹外都畏懼不敢來侵戶口以全耕稼無失時太守張公朝望雅重出守分符撫恤所周悉邀康泰當今四境未安尙虞侵擾巖頂尙有百餘家可共棲幽境何異桃源余因遊觀奉命爲記聊述前後而爲銘曰巍巍靈巖孰廣其土以晏以息安然若堵當今強寇坐陷神京鑿輿幸蜀藩鎮徵兵洞醜相煽頻侵此疆士庶遭戮縮地難藏此樓峻極摩頂千尋四周壁立儼若建瓴雲羅霧蔭楹接椽延何殊仙界無異洞天

明

後隱難記

唐上元間袁晁陷郡鄉民登巖以避圍守經旬不拔一夕解去中和二年黃巢首亂羣盜蜂起焚掠鄉間土人俞強帥衆登巖推武都章承趣爲部領保巖爲固一方以全宋宣和庚子方臘黨洪載寇郡城掠鄉邑里人蔡子昇率梁將惠兄弟與王瀆任祖倡義保巖三鄉獲全元至元丙子九月二日元軍至括郡邑歸附三日哨騎至鄉周坦民登巖避者數千人初元帥唆都營北山旣而移屯城西十月十一日攻西巖立馬指顧東巖而去十五日未明馬步數千來攻仰箭蝟集及巖而墜鄉人

徐澤之攝邑西尉帥鄉大家詣軍前投拜蒙給旗榜禁暴掠是時諸軍駐巖後曰車頭去巖百餘步上下相語乃告所以保巖者避兵鋒耳且投示旗榜軍遂退民保帽籠巖者受攻不可支且誘投拜軍乘閒登巖殺擄數百人次日繇帽籠頂發火矢射東巖以水沃絮被懸林木障蔽之矢不能入至晚軍旋明年丁丑正月軍繇龍泉入閩民始復業十月季文龍作亂忽都互統軍收捕復登巖者三月至正壬辰紅巾徐壽輝黨項普畧寇杭夏五月民登巖避難蔡紹伯據險保護三鄉聚兵力戰明太祖兵下金華紹伯納民獻地投義兵千戶南京驍

宣平縣志 卷之二十三  
騎尉正統己巳宣慈陳鑑湖陶得義等作亂周坦破橋  
峽殺白都司耿叅議等官紹伯孫恭十守巖保民六月  
十七不輯於火玉石俱焚蔡儼同弟公輔等挾從大兵  
討賊賊敗棲巖當道議以巖爲賊巢斲絕巖路賊平儼  
授濡港巡檢陞丹陽主簿嗚呼致使千年保民之地遂  
壞於淺識者哀哉

東西巖遊記

江西提學  
麗水人 何 鏜

海內稱十八洞天栝居其一環栝千里內名山以十數  
惟青田石門爲最勝縉雲仙都爲最奇而穹窿崛起恠  
偉環峙莫過於宣平之東西兩巖然石門仙都皆當孔

道古今人不乏遊覽余亦稔寄跡焉惟兩巖舊爲麗水  
西北奧區去郡城五十里自宣平半程西入十二里鄉  
居人時出誇詡其勝余顧無造賞者天生竒物豈不以  
地限哉萬歷庚辰八月旣望晴霽淡旬余以詩央外兄  
陳少微曰秋日晴暉滿竹林西山名勝待登臨風流爲  
問東郊客竹杖芒鞋一賞心遂訂同往二十六日癸卯  
少微過余出通惠門歷郵亭過稿嶺次周坦午炊訖望  
雙巖踞峙如門林木蒼翳僅通一徑志稱破橋峽正統  
中山寇擾數歲今禾菽垂華青黃遍野熙然樂土也  
過峽數里一水蜿蜒東流爲虎蹟溪度溪而北入宣平

官道遇牧人問徑曰此去西行半里至矣余與少微趨行不二三百武轉見一巖員銳天半石皆頽色巖端數松夭矯摩天疑海中員嶠移在此間傍下石磴可百餘武篠竹夾徑如懸電入澗策杖登躡至洞外戶兩僧來迎上入石洞爲禪院故天闕堂址今稱東明洞宋耆儒蔡伯尹輩以子美宿龍門奉先寺詩天闕象緯逼爲韻者乃因王介甫執定天闕爲天闕誤矣考杜詩千家註龍門乃河中地以兩山並峙如闕故云天闕卽對雲卧詩中語多類是者介甫務爲強解而後人因之不深考故也時日將晡聞巖下有牛鼻洞遂沿洞前小徑西抵

洞下洞穴架屋右爲佛堂左傍石鼻懸注甚奇而僧以土石遮塞連亘爲居室殆損天真薄暮回洞上與少微對酌各書所爲詩少微一聯云橋橫虎蹟千峯合樹杪羊腸一徑懸余曰句與此巖爭雄奇矣已就寢輾轉不成寐至夜分蹴少微起曰四更山吐月可無一當此境邪開戶月鏡中天星斗拄巖端可摘四山峭杳少微曰山靜似太古惟此時此地爲然久之入卧語儒佛異同達旦不休晨興飯罷攜杖穿洞左石徑至溜峽下仰視巖頂入霄漢乃緣石坎而上僅容一足見人粘壁行如猿掛樹重累相次又上數十武轉過一峽壁不容步余

合僧挽余手奮躍而登又數武壁入插杙石隙中布三四板橋爲道相扶得過由微徑十餘武達巖頂而少微杖策獨上移時矣頂曠然可十數畝中有土阜昨所見松樹處倚阜爲祠三楹舊定香院也祠右有日月兩池相傳左清右濁今右稍湮左清冷也又數武有八角茅庵兩楹中各陷入爲一榻所余嘗遊西山洪光寺見有此製豈西方法邪行視罅地俯矚四遠見百里內高山鏡岳環視如蓮葉此巖中秀一齒蒼也昔青蓮登華山落鴈峰謂憾不攜謝眺驚人詩來搔首問青天今得毋似之乎然兄詩何必減宣城也已下巖沿腹北轉尋清

風峽兩崖相臨中空見天光青碧如一綫深入四五十武淒清聲栗如風穴僧謂正統中投崖人抵於此又爲愴然出峽一石特起可數十丈爲卓筆峯峯西爲幞頭巖巖東數十弓見橫石如員蓋下彎如梁名石梁又西北行入陰森中修竹千餘蔽虧天日上爲西巖故留此洞今稱西明洞洞前架屋如樓居可丈許內石穴深廣過東洞佛几前有楞嚴經數卷少微舉問僧無能解者又西上悉就穴架屋黝黑似牛鼻洞又上東過小嶺下至平蕪爲保安院基基右員巖聳峙舊置鐘樓其上巖下古井澄澈可鑿人影地有焦米爲昔被火之遺左見

宜平果志 卷之十三  
西巖頂員銳如幘聞頂地可丈餘無竒耳其東與西巖  
埒削壁千丈爲試劍石石下三四大石欹倚列置四面  
如削平又峭壁前一巒挺峙爲將軍石石下深箐中一  
洞爲桃花洞深入可二丈許中空層疊石片硃研躡足  
令探之云石上平廣可三四丈然難冥搜矣遂攀陟崖  
緣牛鼻洞半巖又沿東巖石逕入僧院留供蔬粥而下  
蓋於兩巖爲一周云至薄暮入城市燈爛然少微穿城  
出東郭余望梅山而歸旦日客問游狀余曰三十年來  
馳騖四方殆萬里所過名山川以百計以爲未足乃輯  
古今遊記一當臥遊幾於籬壁閒失此物故知世人舍  
近圖遠殆余類多矣客曰有是哉遂爲記

入仙巖遊記

王在鎬

過前灣至陶大淤一帶溪流深靚崖峰礙雲杳然迥非  
人間行二三里許忽兩山斜對如萬仞城丹嶂翠壁絕  
石直削下望灘水皆作綠玉色遙見一門如城闐然人  
蛆趨蟻行碧沙間水石幻映真景中人也迫臨其地則  
窈然一深洞巖蓋沙底濶長可三間屋旁則石根深垂  
蓄流澄泓其內幾二丈許真天然元棧地予欲以窩雲  
洞三字題之仰視其上危巘峻嶺可望不可攀入僊巖  
卽在其間也再躡數武側磴懸砌僅容二履古木蟠映

鏡潭榦色青如鐵不知其何名扶筇臨之翛翛然欲化矣

雙巖遊記

王在鎬

渠渠夏屋洞亦天成不事柄鑿而大可數十楹離騷云曾不知夏之爲邱又誰知邱之爲夏哉降望金武聚綠散黑浮白沉青點點籬落間物詢之爲徐真人修行地卽本村人其遺蛻猶在巖側吾直欲吹洞簫喚起眠者矣宣之士女秋時傾邑燒香至此題聯有云石碣平開聲谷應天花半落影檀香發志載此山產冬蘭香遍幽谷而洞石足蹋有聲若坎坎伐鼓者要之蘭所未見而鼓則俗論空中響應多如是耳又聯題岑參句云巖高分石出客到與雲齊此則爲巖寫真也惜前後無餘地上下山多老松雜木竹則布滿山阿似渭川千畝亦一佳景其旁客山支山高低皆圓勁露骨亦可觀

金公巖記

纔到山麓便引人著勝地碧潯外注岑森交陰似桃花洞口水流到人間步步尋入鏡石夾激盈縮于且蓄且馳間隨坎緩急滙窪或淺或深或大或小或平或反上下數之穿潭可八九許至玉膏清泉每從平於掌之黛石盤上瀉於益復可愛當是鮫人曬綃而織女鬪素也



列子曰止水之審爲淵流水之審爲淵淵有九此已漏洩過半矣予詠吾鄉九龍池句云到頭噴洗許由耳徹底堪清孺子纓此水正可頡頏行里許皆原田側盼山陰鬱鬱叢起處煙竹數畝繚繞岑巒下遙遙如百間屋不二里而青靄四塞西南半壁東北半壁倍之俱若百堵城插天開排無纖毫縫裂鬼戕拒人似入天國過天險之關堅壁固壘而其中旌旌隱隱伏列者唐人所謂熊羆元氣間真善名狀緣援而上摩石膚以過側容足不能以寸逼至上界齒齒石梯斗上斗下幾百尺人天蓋從此隔也上復平曠僧禿帶溫飽相多茶多筍頗著名於近邑佛舍後一巖洞上滴水如簷溜比之雙巖微遜至其營庭種蒔則優矣相傳爲光武避地未有據僧寮破竹引澗入釜依稀子美所謂竹竿裊裊細泉分也俯視來時之所仰爲西南半壁者不方而削玉筍千丈旁復抽出一條與前筍亞詢之僧大者爲香鑪峰小者爲淨瓶此亦俗標耳大峯上蒼木萬章攢點頂戴倍覺奇峭欲絕而安頓精舍則向之所謂東北半壁者也至於夕陽迴互乍明乍滅宋之問不云乎此中意無限要與開士說

國朝

台山遊記

李仁灼

山以台名蓋彷彿天台之勝也其開山則伏虎禪師今顯神巖有遺像在遊者路經三石潭入至山半石磴齒齒僅容半履行行而登雲生足下是爲步雲梯路側有亭翼如贅於絕壁顏曰來翠四面葱鬱之色掩映衣袂間如汁染然從此峰回路轉不數武見若盤根錯節枝生連理曰雙樹門又見平而坦光瑩若龜甲曰伏虎石仰而睇之一刹卓其中窅以深闕而寂不知隔斷軟紅塵幾許也堂宇雖不甚峻明潔軒敞肖像熒煌奪目至此境界一新令人飄飄有凌雲想俗果不識消歸何有

矣左則天然池金鱗泳唼水面點點如落星旁有鬻泉冬夏不溢不涸其亦天然共派歟後則掛榜巖最高懸碧落選官耶選佛耶姓氏何縱橫莫辨也最後一嶂圓若桂影當空澄瑩明澈則懸鏡屏在焉此入景者皆山之勝殆與天台之石梁諸景相頡頏者歟吾謂景惟入而其可賞可紀者不僅是也其間茂林修竹之蓊翳錦冠翠羽之翩翩以迨夫奇峰之聳疊插於天外幽壑之險恠盤於谷底仰觀則雲蒸霞蔚霧鎖煙橫變幻而不常俯臨則鶴舞鸞翔象奔獅駭攫拿而莫測何在非景何景非勝而必以八限邪故遊者戾止仰其巖而若見西

來也步其梯而如登彼岸也石可踞池可臨虎不驚而龍可馴也亭則憩之門則履之若寄身於空中樓閣翠蓋夾道相迎也進而天門榜發恍如臚唱傳於闐闐軒鏡屏懸依稀螺髻挽於雲煙疑看花闥苑濯影廣寒也况夫景外之景勝中之勝凡耳得之成聲目遇之成色者又足供人應接不暇乎茲偕同人信宿於此扣槃限韻擊缶長歌幾於劉阮輩呼之欲出又何必登天台始稱勝遊也哉然則八景乃偶標之目台山亦假寓之名會心者得意忘象不爲拘墟之見而馳域外之觀斯得矣

柳城記

章 縱

歲在涪灘月終宿爲簡在張侯涖宣之葺月侯以佳公子宰茲九邑不獲展其驥足簿書多暇凡應舉應革者靡不剗斷而行如絕苞苴禁誣詆創義塾均里徭蒸蒸臻上理矣它若改建黌宮修鉉志乘雖若乏貲值然已熟籌次第焉每念邑無墉壘廩庫逼於東偏罕廛居捍衛之方守土者所宜亟講假以埏築上聞慮不得請因稽古人有樹木爲屏蔽者棟爲上柳次之惟柳易成圍且能禦瘴侯嘗宦隨柳州曾閱碑刻云龍城柳神所守驅四裔城九醜究其實祇府廳事有柳二樹今宣處萬

山中嵐氣常爲人患故僉議柳爲便於是躬步隄塍權  
度近遠周遭不滿千弓正所謂三里之城也檢附隅壯  
日不足六百估丈授丁力取其均計刊扞條行取其密  
旬日之間悉以周匝令曰穉者漑之翳者補之犢留圈  
豕入苙毋令抵觸動搖違者罰噫是雖非一朝夕之需  
而實祇一手足之烈不耗民脂不勦民力侯之思深慮  
遠事簡功倍於此已見一斑瞬息三年柯連枝絡圍合  
根蟠滅限溪雙衢交門四波嫩美色樓櫺排青雖弗敵  
百雉之言言而狂夫亦應瞿瞿而却顧也若乃日暖急  
舒風和根展拖黃揪線飛白搏花美春月於王恭賞靈  
和於張緒似又屬使君風流本色矣昔宋辛仲甫知彭  
州課民植柳以蔭行人目曰補闕柳至李順之變猶相  
戒無傷此樹今萬柳成城功延保障著茲土者歲將補  
罅苴漏以垂不朽詎曰甘棠勿拜云耳哉同人倡爲詩  
排以頌其事是以記之

午溪義塾記

雷仁育

稽諸邑乘午溪距治二里許灤洄占鰲山前文明象也  
曹門鄭居此其先叅議公在宋時建種德堂顏額曰芳  
潤芳桂元統制公子君錫翰林學士嘗御書標其第葢  
扶輿清淑磅礴於山厓水湄間固宜代生俊乂應厥嘉

祥無或爽焉明嘉靖時同族續修前緒建義塾於祠堂之西

國初順治九年增修前規邑宰侯贈堂名琢業康熙甲寅燬於兵四壁門窻胥圯餘惟數椽架屋不蔽風雨耳四十四年樑柱盡傾益深茂草之嘆矣乾隆十一年嗣孫廷相瑞河瑞洛勉登俊登亮六人同心營建鳩工飭材數年間規模畧備復慮局於方隅去止廣藏息也相其基之左右增廓之舊爲楹七茲倍其數至再至三中則講堂旁則廊廻檻曲窈而深往而視昔益爲幽邃學使于耐圃公往隨乃翁宰邑時弱嬉戲過從釣遊池

塘其視學也榜其門曰惇倫儲秀綴以聯有通德丕承龔葉宛垂書帶綠衡文廣教柿林分映筆花紅之句嗣孫勉之父啟周爲嘉郡廣文於郵筒寄聯云率素履攸行孝友睦婣任卹學古訓有獲易書詩禮春秋題額曰通德書塾余壬申寓其宅勉具述覩縷請紀以言夫鄭世族於宣斯塾之建追踪北海通德遺意堪與乃祖父叅議統制諸公後先輝映其揚揭盛烈瑰瑋裔皇有學使公之巨製在余非工於文者庸何言然鄭生瑞河等之爲此義舉也不可不紀以詞詞曰龍岡之陽午溪之旁鍾靈毓秀金馬騰驤惟鄭胥宇長發其祥昭茲來許

肯構肯堂展親錫類我塾爾庠洪鐘待扣厥鳴鏗鏘負  
劍辟呬小大就將梓材丹雘玉樹琳琅叅議踵武藝苑  
翱翔傾倒瀝液鼓吹笙簧詒謀燕翼繼序斯皇山輝川  
媚鬱鬱蒼蒼

建義倉記

在縣治之西明葉令建

何鏜

天下藩省諸郡咸有倉廩歲以正供之什三徵粟儲蓄  
之待時發給官司俸入與夫屯衛兵士之稍食是謂軍  
儲倉其諸縣邑會藏罪人除罪之入粟迨歲之荒凶以  
賑貧民是謂預備倉軍儲計歲所入以爲出故有定額  
卽稍羨不得旁及於民預備之層積籍在公府歲歲覆

覈雖名爲民乃饑歲不得輒發必於所轄次第請白待  
報而施已屬後時民之卮危廩廩何賴焉故議者藉藉  
稱漢常平宋社倉爲善然稽其終敝斂散無常僻遠寡  
實惠法外之奸不無反爲民病於是遂諉之曰救荒無  
竒策嗟乎救荒之策豈有大於蓄貯者哉今年仲夏枯  
蒼諸邑時惟恒暘而御史大夫徐公省方問俗遵海而  
西檄諸邑長吏舉行義倉得以便宜從事務以利民令  
所在施行之然未輒有應者宣平葉侯奉令甚謹以爲  
大夫加惠斯民德意甚盛吾屬司牧苟利於民中心圖  
之邁會肅將是惟在我顧安所得羨緡制置之耳往里

宣平縣志 卷之十三 一四  
役緣習不以期月率先半載隳教捍禁莫此爲甚乃令  
來歲之役率以春日始事歲終而竣其先滿歲者得謝  
役而歸其以半載罷役出錢輸粟人各若干各役驩然  
惟命計得粟六百石有奇又以爲民業灌輸斂藏無所  
不可重費之也乃捐自所俸入若干緡鳩工庀具屬典  
史胡器董其役不踰月而告成於是著爲令自今以始  
凡在官者有所義積咸在於斯凡在民者有所義助咸  
在於斯凡凶荒之歲吾民之無告與無能爲生者咸給  
於斯是爲吾人之義舉不必按籍而稽覈是爲邑之義  
倉可不待請而發夫非大中丞之義惠即使歲歲長吏  
悉以是意推行之其所蓄積當不啻是其所以恤災患  
而憂元元豈其微哉

三笋阮禱雨記 道光

邑令 黃維同

歲乙未夏旱余以禱雨之所詢於鄉耆對曰去邑西二  
十五里有山焉溪在其上爲三笋阮溪之委有潭焉實  
爲龍宅請禱之余曰邑志不載何也曰山險僻人罕至  
向之禱者塗未半輒止矣故志亦弗及余曰禱弗親至  
猶弗禱也遂齋戒而往至飯甌山離潭十餘里徑險甚  
輿弗能前乃易小輿行數里將近阮徑狹而愈險小輿  
至不能轉旋余乃舍輿而行循溪畔履巉巖蹶於石幸

無傷溪流盡處爲山坡傾仄甚余逡巡而下見石峯卓立雲表峯左右迴抱若環而其中爲潭溪水自峯左飛而下注於潭作激玉聲一鑑激然深不見底寒氣襲人真可五月披裘也土人謂之第三潭潭水流出復滙爲潭稍淺狹是爲第二潭水從二潭出右行數十步瀉於懸崖下臨而俯視崖半有平地寬廣約一畝許而土人以爲第一潭向在其地近徙入崖內不可見其下亦峭壁不可登此亘古無人跡處境更幽絕余乃拜禱於第三潭之側禱畢白雲一縷起於潭中覆於上若蓋遂尋來徑而返風聲起雷聲隆隆然急趨出阮覓小輿行未一里大雨沛然余衣盡濕田禾獲霑足焉往禱之時日甚烈無纖雲衆疑其不雨已而得雨咸知潭有靈神山爲靈境前此禱弗至志弗載山幾晦矣今始彰焉蓋天下奇境近在咫尺每多忽之而出雲降雨靈應昭昭其精氣足以震耀於世必不至泯沒無聞若茲山者豈不然乎或曰合往禱而茲山以彰是合爲宜邑關一奇境也不可以不記余記之所以告後之禱雨者而非以或人之言爲然也

潘家寺石香爐記

道光

黃維同

宜邑多山而少水十日不雨農有憂色故常有事於祈



宣平縣志 卷之十三 十一  
禱先是邑有五足鐵爐禱雨輒應名播於鄰鄰邑借禱者衆因而遂失蓋旱而無以爲禱者久矣幸又有一爐出於潘家寺寺久廢地中空相傳有龍宅乎其中乙未夏其地之人掘土而獲爐石質狀如鉢中可容二升許外鑿成蓮花形旁微有損痕經鋤掘也羣相詫爲龍宮物時苦旱大萊之民迎而禱之雨輒降余聞之齊戒以迎之未至邑雷雨交作越翼日雨越三日大雨是歲他邑饑而宣邑不成災然則出自龍宮之說雖無可稽而非有神憑之烏能靈應若此乎潛於土中見於一旦物之神者殆難終秘乎而當蘊隆之餘作霖雨之用神物之出有其時焉豈偶然乎余竊幸早歲獲神爐之助而尤願邑之人藏之必謹禱之必虔勿使如前此之爐一失而無從復索也因援筆而記之

遊巖山記

俞宗煥

宣邑處萬山中東台山西樞樣南東巖並推奇勝獨巖山居邑之中巖從嶠嶻巖然特峙顧爲遊屐所不經題咏缺然予耳其名思窮其境者屢矣適同里鄭君浩然攜榼與偕遂問途於樵子出西郭由午溪隄岸五里至金山自金山折而東見一峰陡然出羣峰表天矯若龍樵子曰此巖山也仰睇之如在目前再行里許爲松樹

隴口由隴北入爲水背下石梁橫亘水聲潺潺落梁下如跳珠戛玉清爽宜人旁有石坡可坐憩視巖山則又遠隔數峰矣再進爲塘隴巖山忽不見樵子曰此山麓也山分兩道南進則嶺逶迤而路修西進則路甚陡浩然曰南上而西下可乎予曰善山南無民居途仄泥滑泉出澗半灑灑有聲殆爾雅所謂汎泉仄出者也樵子曰此兩龍眼也與山左之巖竇出者相對上有風洞深黑不見底每風起中作嗚嗚聲如鬱而不得舒者然至洞口則扶搖直上六月生寒自澗至坪漸高漸曲歷山半則松濤撲地急吹沸空路轉羊腸如入台山雙樹門

無級可拾浩然賈勇先登予緩步從之再十餘折始聞雞犬聲見野廟塑三元真君像不知肇自何時先是廟久廢僅一石香爐存藁莽中外有焚紙庫石脚皆明代物今廟則嘉慶間里人募捐重建者也廟離岡巔十丈振衣直上升其崇椒側睨峭壁高百仞心胆掉栗中橫縫團團如兩大磨盤相疊山後平疇里許彎如月鉤疇外小山連接環抱若屏湯山在頂楊子里河澗雪坑順源諸村落碁布星羅燦然在目湯山後層巒疊嶂毗湯溪界青烏家謂鮑村山脈自湯溪來巖山爲邑祖龍是也中分三岡左右有斷峽闊丈許深倍之土人傳爲明

宣平縣志 卷之二十三  
季斷諸雄勝地舊跡予諦視之石無斧鑿痕其言殆未  
可信山偏東稍平處爲齊雲觀廢址其偏西則怪石林  
立怒者虎鬪企者鳥厲玲瓏像人物形者甚夥其下多  
洞秋冬春三時氣蒸蒸直上如煙霧予欲往遇險而止  
於是酌酒賦詩爲之徘徊不忍去俄而夕陽在山樵子  
促歸遂全浩然由山西下夫有此山卽有此山之奇胡  
以吟咏不及豈地非衝要無名流遊翫到此耶抑頽廢  
旣久荆棘銅駝無復過而問焉者耶浩然曰一雁蕩也  
雄奇突兀勝概甲於浙東至宋始顯而何有於茲山歟  
抑豈山之顯晦自有其時而不可測者歟莊生曰舊國  
舊都望之暢然雖使邱陵草木之緝入之者十九猶之  
暢然况見見聞聞者也噫盡之矣

